

Kuyantika I

Yobi

Kuyantika 2

Kuyantika 4


Kuyantika 5

Kubasika

Levi

Kutanga

Kulonga



MIKANDA ya Kutanga ti Kulonga

(Ba Leso 20 sambu na bana ti bajeune)

Musoniki: *Maman Lorella Rouster. MCE*

Edition 2025



NB: Moniteur, Na ntwala kulonga mukanda yai, longa ntete 'Mikanda ya Kubasika ti Levi'.

Mikanda ya Kutanga ti Kulonga

Malongi ya kele na mukanda yai :

Leso 1. Nzambi songaka Israele kutanga nombre ya bafami, ti Yandi pesaka konso dikanda kisalu na yo.
Kutanga 1-4p.2

Leso 2. Nzambi songaka Israele bansiku ya nkaka ti twadisaka bo diaka na matuti na Yandi. **Kutanga 5-9**.....p.6

Leso 3. Bantu ya Israele salaka bampungi, ti bo katukaka na Ngumba ya Sinai.
Kutanga 10.....p.9

Leso 4. Bantu ya Israele bokutaka.
Kutanga 11.....p.12

Leso 5. Miriami ti Aroni tongaka Moize.
Kutanga 12p.15

Leso 6. Bantu ya Israele tindaka baespion, ebuna bo buyaka kukota nsi ya Kanana.
Kutanga 13-14p.18

Leso 7. Kora salaka rebelio kunwanisa Moize.
Kutanga 16.....p.22

Leso 8. Bantu waka makasi na Moize diaka.
Kutanga 17 :6-26.....p.26

Leso 9. Makasi bendaka Moize kusala mbi, ti Miriami ti Aroni kufwaka na nseke.
Kutanga 20.....p.30

Leso 10. Banioka tatitaka bantu. Bo zolaka kufwa, kansi Nzambi songaka Moize mpila bo lenda guluka.
Kutanga 21.....p.34

Leso 11. Balami monaka mpila ve kusinga Israele.
Kutanga 22-24.....p.37

Leso 12. Bantu ya Israele yantikaka kuyilama kukota nsi ya Nzambi me sila bo.
Kutanga 25 & 26p.41

Leso 13. Moize ndimaka ndola ya Nzambi pesaka yandi ti salaka kisalu na yandi ya nsuka.

Kutanga 27 :12-23.....p.45

Leso 14 Ndambu ya makanda bakaka ntoto na bo, kansi bo fweti ntete sadisa bampangi kubaka ntoto yonso.

Kutanga 32.....p.48

Leso 15 Nzambi songaka mpila kukabisa ntoto na kati ya makanda ya Israele.

Kutanga 34 :1-8.....p.51

Leso 16 Bantu ya Israele bambukaka diaka bamvula ya bo tambulaka na nseke.

Kulonga kapu 1--2 :23.....p.54

Leso 17 Bantu ya Israele nungaka bamvita na este ya nzadi ya Yordani.

Kulonga 2 :24-31.....p.58

Leso 18 Moize bambukisaka bo bansiku yonso ya Nzambi me pesa. Bo fweti landa yo bu bo kota nsi ya Nzambi zola kupesa bo.

Kulonga kapu 4-30.....p.61

Leso 19 Moize manisaka kisalu Nzambi pesaka yandi, ebuna yandi fwaka na lukanu ya Nzambi.

Kulonga 31, 32 :48-52 ; 34 :1-9p.64

Leso 20 Revisio ya Mikanda ya Kutanga ti Kulonga.....p.68

Balinya ya Ntangu.....p.71

Bangindu kusadisa bana kulonguka mikanda ya Bible.....p.75

Bankunga ya beto sadila na mukanda yai.....p.77

NB : Baverse ya Bible ya beto sadila na mukanda yai kele ya Version Mwinda.

Moniteur, NB : Na nima ya baleso yai, mbote kulonga-- Mukanda ya Yozue--Israele Kotaka Ntoto na Bo

Leso 1. Nzambi songaka Israele kutanga nombre ya bafami, ti pesaka konso dikanda kisalu na yo.

I. Preparasio ya Moniteur--

Mukanda ya Kutanga kapu 1—4, (somere)

◎ Kikuma ya lesos :

Bana ta sosa kuzaba ti kulanda lukanu ya Nzambi ti kisalu Yandi me pesa beto.

♥ Verse ya kulonguka :

[NB : Moniteur, na mukanda yai ya mvimba, beto me kabisa verse na baphrase ya nge lenda landa kulonga bana na bidimbu yai : /.../. Beto me souligne bandinga ya beno lenda longa na bana prescolaire.]

...Mameme ke waka ndinda ya Mvungi. / Mvungi ya mameme /ke binga mameme na Yandi,/ konso dimeme na zina na Yandi./ Yandi ke twadisa bo, /ti bo ke landa Yandi, /sambu bo zaba ndinga na Yandi. / Yoane 10 :3b, 4

☛ Bankunga ya kwenda nzila mosi ti lesos :

[Moniteur, NB : Bandinga ya bankunga ya beto ta pesa na baleso yonso, bo ke monika na nsuka ya mukanda yai. Nge mpi lenda yimba bankunga ya nkaka ya ke landa ngindu ya kikuma ya lesos, to nge mosi lenda yidika bankunga ya naka ya ke pesa ngindu yina.]

Yesu Zaba Zina na Mono
Baka Lukumu

Moniteur, Bakisa Mikanda ya Bible ‘Kutanga’ ti ‘Kulonga’ :

Mukanda ‘Kutanga’, bo me pesa yo zina yina sambu yo ke songa mbala zole ya bantwadisi tangaka bantu ya Israele. Mukanda ke songa bamambu ya salamaka, yantika ntangu bo me tula campe na Ngumba ya Sinai na ntoto ya zelo na zelo, tii ntangu ya bo vandaka penepene kukota nsi Kanana, nsi ya Nzambi silaka na bankaka na bo.

Mukanda ‘Kulonga,’ bo me pesa yo zina yina

sambu yo ke songa mpila Nzambi songaka Moize kulonga bo diaka na ntwala bo kotaka nsi na bo. Yesu tubaka baverse ya mukanda yai mbala mingi na malongi na Yandi.

II. Kusala Revisio—

Na mukanda ya Kubasika, beto me mona nde bantu ya Israele basikaka na kimpika na Ezipte.

- ↑ Na nima bo me bika Ezipte, bo vandaka na nzila kukwenda wapi ? (Na nsi ya Kanana, sika Nzambi silaka na bankaka na bo.)
- ↑ Na kati-kati ya Ezipte ti Kanana kele ntoto ya nki mutindu ? (Ntoto ya zelo na zelo)
- ↑ Na kati-kati mpi kele ngumba ya Sinai. Nki salamaka kuna ? (Nzambi pesaka Moize bansiku na Yandi, ti Yandi songaka bo nki mutindu kusala nzo ya bisambu ya ntenta. Bo salaka yo ti yantikaka kusamba na kati.)

III. Kulonga bana lesos :

→ **Kuyantika lesos :**
Beto me bika bantu ya Israele na ntoto ya zelo na zelo. Bo me baka bansiku ya Nzambi, ti bo me tunga nzo ya bisambu ya ntenta na mpila Nzambi songaka bo. Bo me yidika bilele ya banganga-Nzambi na mpila Nzambi me songa bo. Lukumu ya Nzambi me fulusa nzo ya bisambu yina. Nki ta salama ntangu yai ? Beto me kuma na mukanda ya iya ya Moize, mukanda ya Kutanga, kapu ya ntete.

❖ Developpement—Malongi ya nene ya lesos na banti 4:

1.1 Bantu ya Israele tangaka bafami, konso fami na tribu na yandi, mutindu Nzambi songaka bo. Bafami yonso kumaka na 603,550.

☛ Tangila bana : Kutanga 1 :1-46, (bitini)

1-2 Ntangu bantu ya Israele vandaka me basika na nsi ya Ezipte imene, bo vandaka me lungisa mvula mosi na ntoto ya zelo na zelo ya Sinai...Mfumu Nzambi kwisaka kutuba na Moize na kati ya Nzo-Nzambi ya ntenta nde :

« *Tanga ntalu ya bantu yonso ya Israele, na makanda na bo...*

17-19 Moize ti Aroni... bingaka kimvuka yonso ya Israele... Bo tangaka bafami na bo ti makanda na bo. Bo sonikaka bazina ya babakala yina me lungisa bamvula 20 to kuluta. Mpidina Moize tangaka ntalu ya bantu ... mutindu Mfumu Nzambi songaka yandi.

46 Ntalu na bo yonso vandaka 603,550.

? Yula bana :

¶ Bana sala bageste :

¶ Bana yimba ti kina :

1.2 Bo tangaka ve dikanda ya Levi, sambu kisalu na bo vandaka na nzo ya bisambu.

Tangila bana : *Kutanga 1 :47-50, 3 :9-10*

1 :47-50 Kansi bantu ya dikanda ya Levi, bo tangaka bo ve nzila mosi na makanda ya nkaka, sambu Mfumu Nzambi tubaka na Moize nde : Kutanga ve bantu ya dikanda ya Levi ... Kansi pesa bo kisalu ya kutala nzo-Nzambi ti bima na yo yonso...

3 :9 Na kati ya bantu ya Israele, nge ta pesa bantu ya dikanda ya Levi na maboko ya Aroni ti bana na yandi sambu na kutala Nzo-Nzambi.

10 ... Konso muntu yina kele na nganda ya fami ya Aroni, kana yandi meka kusala kinganga, yandi fweti baka ndola ya lufwa. »

? Yula bana :

¶ Bana sala bageste :

¶ Bana yimba ti kina :

1.3 Bo landaka ordre ya Nzambi pesaka bo kuyidika camp kulanda makanda na bo.

Tangila bana : *Kutanga 2 :34*

34 Ebuna bantu yonso ya Israele salaka yonso ya Nzambi songaka Moize. Bo tulaka bidimbu ya bafami na bo na bisika kaka ya Yandi songaka bo.

? Yula bana :

¶ Bana sala bageste :

¶ Bana yimba ti kina :

1.4 Nzambi pesaka dikanda ya Kehati kisalu ya kunata bima ya nsiku ya nzo ya bisambu ntangu bo tambulaka, kansi kaka na mpila Nzambi songaka bo. Makanda ya nkaka ya Aroni, kisalu na bo kunata bima ya nkaka.

Tangila bana : *Kutanga 4 :18-19*

18-19 bana ya Kehati... Bo ta fwa ve ntangu bo nata bima ya santu, kansi bo lenda ve kota ntangu banganga kele kufika bima yina. Songa konso muntu kisalu ya yandi fweti sala, ti kima ya yandi fweti nata.

24,29 Kisalu ya bana ya Gersoni, yo yai ti bima bo fweti nata ... 29 Kisalu ya bana ya Merari, yo yai ti bima bo fweti nata...

49...Bo songaka konso muntu kisalu ya yandi fweti sala ti bima ya yandi fweti nata.

? Yula bana :

¶ Bana sala bageste :

¶ Bana yimba ti kina :

>|< Kumanisa lesosambu :

Nzambi pesaka konso muntu kisalu na yandi ya kusala, ti konso kisalu kele kaka ya mfunu na meso na Yandi.

Beto bakristo lenda lomba Nzambi nde Yandi songa beto nki kisalu Yandi zola beto kusala, muntu na muntu. Na nima, beto kaka landa nzila ya Yandi me songa. .

Devoir sambu na bakristo :

Devoir mono ke pesa beno bakristo, yo yai : Na mposo yai, samba Nzambi nde Yandi songa nge nki kisalu Yandi zola nge kusala. Yindula nki makabu Yandi me pesa nge dezia. Ebuna landa nzila yina na ntima na nge yonso.

† Kubinga bana ya zaba Yesu ntete ve :

Na leso yai, mono me tuba na bakristo. Kansi zaba nde bisalu ya mbote ta nata muntu na zulu ve. Konso muntu ke na mfunu kubalula ntima, kundima Yesu Kristo bonso Mvulusi, mpi Mfumu. Kana nge zola beto kusamba ti nge na mambu yina, nge lenda bikala na nima ya ecodim, sambu beto sadisa nge.

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti longa mikanda ya Bible. Tala bangindu na nsuka ya mukanda yai.

==NSUKA YA LESO 1



Nzambi songaka bo nki kusala konso muntu fweti sala ti nki bima yandi fweti nata kana bo vandaka na nzila kukwenda.

Nzambi kele na kisalu sambu na konso muntu. Beto lomba Yandi kusonga beto yo.

Leso 1

*...Mameme ke waka ndinga ya
Mvungi.*

*Mvungi ya mameme ke binga
mameme na Yandi,
konso dimeme na zina na Yandi.*

**Yandi ke twadisa bo,
ti bo ke landa Yandi,
sambu bo zaba ndinga na
Yandi.**

Yoane 10 :3b, 4b

Leso 2. Nzambi songaka Israele bansiku ya nkaka ti twadisaka bo diaka na matuti na Yandi.

I. Preparasio ya Moniteur—

Kutanga kapu 5 tii na kapu 9. (Somere)

◎ Moniteur, yilama na Kikuma ya Leso :

Bana ta tula ngolo kulanda Nzambi na mpila Yandi ke songa bo na ndinga na Yandi.

♥ Moniteur, yilama na Verse ya Kulonguka :
...Twadisa mono na nzila na Nge ya longo.
Bankunga 5 :9b

❖ Bankunga ya kwenda nzila mosi ti lesos:

Kwenda na Yesu
Landa, Mo' Ta Landa Nge, Mfumu
Mfumu Zaba Nzila na Mono

II. Kusala Revisio—

↑ Beto me mona nde Nzambi songaka bantu ya Israele kutanga bafami na bo, konso fami na tata, sambu yandi ntawadi. Na nima, Yandi songaka konso fami kisalu na bo, ti bana ya Aroni kisalu na kati ya nzo-Nzambi.

III. Kulonga Bana Leso Yai—

➔ Kuyantika Leso :

Keti ntangu yai, bantu ya Israele me yilama kulanda diaka voyage na bo ? Nki ta salama ntangu yai ? Nki mutindu bo ta zaba nzila bo fweti kwenda ? Beto landa histoire na Kutanga 5.

❖ Developpement—Malongi ya Leso Yai na Banti 4:

2.1 Nzambi pesaka bantu na Yandi bansiku ya nkaka diaka. Nsiku mosi vandaka ‘nsiku ya kuvutula.’

❖ Tangila bana : Kutanga 5 :5-8

5:5-6 Mfumu Nzambi songaka Moize na kutuba na bantu ya Israele nde : « Konso muntu, nkento to bakala, kana yandi me sala mpangi

na yandi mbi, yandi me fwa nsiku ya Mfumu Nzambi mpenza.

7 Kana yandi me baka kima ya muntu, yandi fweti ndima masumu na yandi ti kuvutula kima yango na munkwa na yo. Na zulu na yo, yandi fweti . . . yika na zulu ya kima yina.

8 Kana munkwa-kima me fwaka, yandi mpi ke na mpangi ve lenda baka kima yina, kima yango bo fweti pesa yo na Mfumu Nzambi. Yo ta vanda ya nganga-Nzambi.

? Yula bana :

† Bana sala bageste :

❖ Bana yimba ti kina :

2.2 Nzami songaka Aroni ti bana na yandi mpila ya kusakumuna bantu ya Israele.

❖ Tangila bana :

6 :22-23 Mfumu Nzambi songaka Moize :
« Tuba na Aroni ti bana na yandi nde :
“Ntangu beno ta sakumuna bantu ya Israele,
beno fweti tuba . . . :

24-25 ‘Mfumu Nzambi sakumuna beno, Yandi keba beno. Mfumu Nzambi wila beno mawa.

26 Mfumu Nzambi kudisonga na beno. Yandi pesa beno ngemba.’

27 Bo ta tula zina na Mono na bantu ya Israele, ti Mono ta sakumuna bo.”

? Yula bana :

† Bana sala bageste :

❖ Bana yimba ti kina :

2.3 Bo pesaka bamakabu mingi sambu na kusakumuna nzo-Nzambi ti kusakumuna banganga-Nzambi sambu bo sala kisalu ya Nzambi.

❖ Tangila bana somere yai ya Kutanga kapu 7:

Mbala mingi, kana beto me tunga nzo ya mpa to nzo-Nzambi ya mpa, beto zola sakumuna yo

sambu na kisalu ya Nzambi. Bana ya Israele mpi salaka mutindu yina sambu na Nzo ya Bisambu ya Ntenta ya bo me sala, mpi sambu na bantu yina me kuma banganga-Nzambi. Konso dikanda ya Israele nataka bambisi ti bima ya nkaka ya ntalu bonso makabu. Bilumbu mingi bo salaka fete na kusakumuna nzo ya bisambu ti banganga-Nzambi yina ta sala na kati na yo.

2.4 Dituti ya Nzambi twadisaka bo, ebuna bo landaka yo.

Tangila bana : Kutanga 9 :15-18

15 Kilumbu ya bo tedimiska Nzo-Nzambi ya ntenta, dituti kwisaka kufika yo na sika ya kuluta nsiku. Ebuna na mpimpa tii na suka, dituti yango vandaka kupela bonso tiya.

16-17 Ebuna katuka kilumbu yango tii kuna, kana dituti me tombuka na zulu ya Nzo-Nzambi ya ntenta, bana ya Israele vandaka kupanza camp na bo sambu na kuvwayaze. Ti, na sika ya yo kubwaka ti telamaka, bo vandaka kutunga camp na bo diaka.

18 Nzambi vandaka kutwadisa bo mpidina. Kana dituti me telama kaka na zulu ya Nzo-Nzambi, bo bikalaka kaka po pana na bantenta na bo.

? Yula bana :

Bana sala bageste :

Bana yimba ti kina :

>|< Kumanisa Leso :

Nzambi twadisaka bantu ya Israele na nseke. Yandi tindaka dituti na Yandi. Yo telama na zulu ya nzo ya bisambu kana bo fweti bikala na sika yina. Yo kwendaka na ntwala na bo kana bo fweti kwenda.

Bubuyai, Nzambi me pesa beto mambu zole ya lenda twadisa beto. 1) Mosi kele ndinga na Yandi,

Bible. 2) Ya zole kele Mpeve ya Nzambi ya kele na kati ya beto bakristo.

Kana beto ke tanga Bible, ke wa malongi na yo, ke tula ngolo kusala malongi na yo ya beto me wa, Mpeve ya Nzambi ta twadisa beto ti songa beto nzila. Beto tula ngolo kulanda Yandi.

Devoir sambu na bakristo :

Beno bakristo, devoir mono ke pesa beno mposo yai, yo yai : Tanga ndambu ya Bible konso lumbu, to nge lomba muntu ya nkaka kutangila nge.

Lomba Nzambi kutwadisa nge, ebuna sala yonso ya Nzambi ke songa nge na ndinga na Yandi.

Kubinga bana ya zaba Yesu ntete ve :

Kansi kana nge me tula ntima na Yesu ntete ve, devoir ya ntete Nzambi ke lomba na nge kele kubakisa masumu na nge, kubalula ntima, kutula kivuvu na Mwana na Yandi Yesu Kristo.

Beto vandaka na makambu ya nene ti Nzambi sambu beto yonso me fwaka bansiku na Yandi. Beto vandaka ve na mpila ya kuguluka, beto mosi. Yo yina, na luzolu na Yandi, Yesu Kristo kwisaka sambu Yandi kufwa na sika na beto, Yandi manisa makambo na beto ti Nzambi.


Yandi Yesu me sala yonso. Yo lomba kaka nge kubalula ntima, kutula kivuvu na Yandi, kundima Yandi bonso Mvulusi na nge. Yandi ta pesa nge ntima ya mpa. Keti nge ta ndima Yandi bubuyai ?

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

====NSUKA YA LESO 2

Leso 2



**...Twadisa mono
na nzila na Nge
ya longo.**

Bankunga 5 :9b

Leso 3. Bantu ya Israele salaka bampungi, ti bo katukaka na Ngumba ya Sinai.

I. Preparasio ya Moniteur sambu na Leso Yai—

Kutanga 10

Moniteur, kuyidika na ntwala :

Sambu na lesos, nge ta vanda na mfunu ya kima kusonga dituti ya twadisaka bo. Yo lenda papie, nkodi, to lele.

◎ **Kikuma ya Leso :**

Bana tula ngolo kukwikila ti kulemfuka sambu Nzambi sakumuna bo.

♥ **Verse ya Kulonguka :**

Kana beto ke landaka bansiku ya Nzambi,/ yo ke songaka nde/ beto zaba Yandi. I Yoane 2 :3

☛ **Bankunga ya kwenda nzila mosi ti lesos yai :**

Kana Beto Kwenda na Nzila ya Nzambi.
Mfumu Zaba Nzila na Mono

II. Kusala Revisio—

➤ Beto me mona nde bantu ya Israele me basika na kimpika na Ezipre. Bo vandaka na nzila kukwenda na nsi ya Kanana, nsi ya Nzambi silaka na bankaka na bo. Bo kumaka na Mont Sinai, sika bo vandaka kiteso ya bamvula zole. Kuna, Nzambi pesaka bo Bansiku Kumi ya nene na Yandi. Yandi songaka bo mpila kutunga Nzo ya Ntenta ya Bisambu ti mpila kusamba na kati na yo. Yandi pesaka bo bansiku ya nkaka mpi. Bo salaka Fete ya Paki, ti Nzambi tindaka dituti sambu na kutwadisa bo.

Bubuyai beto ta mona mpila Nzambi vandaka kutwadisa bo na dituti yina. Kansi na ntwala bo landaka vwayze diaka, Nzambi vandaka na kisalu mosi diaka Yandi songaka bo kusala. Beto mona yo na Kutanga kapu 10.

III. Kulonga Bana Leso Yai—

➔ **Kuyantika Leso :**

Nge lenda mona baleso ya nkaka na--

<https://mwindaproject-ecm.com/free-kituba-language-bible-teaching-resources-for-you/>

Na bilumbu ya ntama, bambuta na beto awa na Congo vandaka kubinga bantu kuvukana nki mutindu ? Ee, bo bulaka ngoma. Ndinga ya ngoma kwendaka ntama kusonga bantu kukwisa, to kusonga bo mambu ya kingonza, mambu ya mawa, to mambu ya kiese.

Na ntwala bantu ya Israele landaka voyaze na bo diaka, Nzambi zolaka bo sala kima ya ta sadisa bo kubinga bantu. Yandi songaka bo kusala bampungi ya arza.

❖ **Developpement—Malongi ya Leso Yai na Banti 4 :**

3.1 Camp vandaka nene ti bantu mingi. Yo yina, Nzambi songaka bo nzila ya kubinga bantu sambu bo kwisa vukana. Yandi songaka bo kusala bampungi zole ya arza.

❖ **Tangila bana :**

Kutanga 10 :1 Mfumu Nzambi tubaka na Moize nde :

2 Sala bampungi zole na arza... Beno ta sadila yo sambu na kubingila bantu ya Israele, bo kwisa kuvukana, to sambu na kusonga bo kupanza camp, bo kwenda.

NB : Nzambi songaka bo mpila kusadila bampungi yina mpi kubinga bantu na nzo ya bisambu, kusonga mambu ya kigonsa, kusonga nde ntangu ya fete me yantika, etc.

❖ **Yula bana :**

❖ **Bana sala bageste :**

❖ **Bana yimba ti kina :**

3.2 Nzambi twadisaka bo kulanda nzila diaka.

❖ **Tangila bana :** Kutanga 10 :11-13

11 ...dituti yina vandaka kufika Nzo-Nzambi ya ntenta, yo katukaka.

12 Ebuna bantu ya Israele katukaka na ntoto ya zelo na zelo ya Sinai. Bo simbaka nzila kukwenda...

13 Bo yantikaka kukwenda mutindu Mfumu Nzambi songaka Moize.

? Yula bana :

! Bana sala bageste :

*** Bana yimba ti kina :**

3.3 Bo kwendaka na lusadisu ya mpangi ya Moize zina ya Obabi. Dituti songaka bo nzila, kansi Obabi songaka bo mambu ya mfunu bonso wapi banto ya masa.

¶ Tangila bana : Kutanga 10 :29-31

29 . . . Moize tubaka na Obabi. . (mpangi ya Moize ya zabaka nseke yina) nde : “Beto ke kwenda na ntoto yina ya Mfumu Nzambi tubaka nde Yandi ta pesa beto. Kwisa, beto kwendeno...

31 Moize nde : « Pardo, kubika beto ve, Nge zaba mbote nki mutindu beto lenda tunga camp na beto na ntoto ya zelo na zelo . . .

? Yula bana :

! Bana sala bageste :

*** Bana yimba ti kina :**

3.4 Nzambi twadisaka bo bilumbu 3 na dituti na Yandi, ti sanduku na Yandi kwendaka na ntwala sambu Yandi bebisa bambeni na ntwala na bo.

¶ Tangila bana : Kutanga 10 :33-35

33 Bantu ya Israele katukaka kuna na ngumba ya Mfumu Nzambi. Bo tambulaka bilumbu tatu. Sanduku ya kuwakana ya Mfumu Nzambi vandaka kwenda na ntwala na bo kusonga bo nzila.

34 Dituti ya Nzambi vandaka kufika bo konso lumbu, kana bo vandaka kubasika na camp.

35 Konso ntangu ya Sanduku ya Kuwakana vandaka kwenda na ntwala, Moize vandaka kutuba nde : “Mfumu Nzambi, telama ! Panza bambeni na Nge. Bika bo ya menga Nge, bo tina.”

? Yula bana :

! Bana sala bageste :

*** Bana yimba ti kina :**

>|< Kumanisa Leso :

Bantu ya Israele tambulaka mbote na ntoto ya zelo na zelo ntangu bo vandaka kukwikila ndinga ya Nzambi ti kulemfuka na yo. Bubuyai, Nzambi ke twadisa beto na dituti ve, kansi Yandi me pesa beto kima ya kuluta mbote--Ndinga na Yandi. Bible ke songa beto mambu yonso ya mfunu sambu na lukwikilu ti luzingu na beto.

✋ Devoir sambu na bakristo :

Beno bakristo, na mposo yai mono ke lomba beno kutula ngolo kutanga to kuwa ndinga ya Nzambi konso lumbu, ebuna kutula ngolo mpi kulemfuka na yo.

✚ Kubinga bana ya zaba Yesu ntete ve :

Kana nge me tula ntima na Yesu ntete ve, zaba nde mambu Nzambi ke lomba na nge kele kutula ntima na Mwana na Yandi Yesu, ya Yandi me tinda sambu na kugulusa nge. Ntangu nge tula Yandi ntima, Yandi pesa nge ntima ya mpa ya zola kulemfuka na Nzambi.

Kana nge zola tula Yandi ntima bubuyai, kaka binga Yandi, ti songa Yandi nde nge kwikila Yandi, nge zola kutula Yandi ntima bubu. Lomba Yandi kugulusa nge. Yandi ta wa konso nani yina binga zina na Yandi na kieleka.

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

==NSUKA YA LESO 3

Leso 3

Kana beto ke landaka bandsiku ya Nzambi, yo ke songaka nde beto zaba Yandi.



Nzambi songaka
bantu ya Israele
kusala bampungi
sambu na kubinga
bantu kutana.

1 Yoane 2 :3

Leso 4. Bantu ya Israele bokutaka.

I. Preparasio ya Moniteur sambu na Leso Yai

Kutanga 11

◎ Kikuma ya lesosambu :

Bana ta bokuta ve na ntangu ya mpasi, kansi bo ta samba Nzambi, sambu bo ta bakisa nde Yandi zola sadisa bo.

♥ Verse ya kulonguka :

*Beno kubokuta ve /mutindu bantu ya nkaka na kati na bo bokutaka,/ ebuna wanzio ya lufwa fwaka bo./
1 Korinto 10 :10*

↖ Bankunga ya kwenda nzila mosi ti lesosambu :

Lomba na Nzambi Kaka, verse 2 (Nzambi zola sadisa...)

O Keba Munoko Nki Nge Tuba (Bokuta Ve!)

II. Kusala Revisio—

➤ Beto me mona nde, na nima bantu ya Israele tangaka bafami na bo dikanda na dikanda, ntangu lungaka nde bantu ya Israele katuka na Ngumba ya Sinai. Ebuna bo yantika voyage na bo diaka na nseke ya zelo na zelo. Kansi, na ntwala ya kuyantika vwayaze, Nzambi songaka bo kusala nki sambu bo sadila yo kubinga bantu ? (Batrompette)

Na mukanda ya Kubasika, beto monaka nde ntangu bo vandaka na mfunu ya madia, Nzambi pesaka bo nki sambu bo kudia ?
(Mana ya vandaka kulala na zulu ya ntoto konso suka. Bo fweti kaka lokuta yo.)

III. Kulonga Bana Lesosambu—

➔ Kuyantika Leso :

Nzambi na beto kele mbote to mbi ? (Mbote kaka.)
Keti Yandi zola pesa beto bima ya mbote to ya mpasi ? (Ya mbote)

Beto zaba nde Nzambi kele mbote, mpi nde Yandi zola pesa beto bima ya mbote. Kansi, beto ke zinga na bwala na Yandi ntete ve. Beto mona mambu mingi ya mpasi na luzingu na beto. Mpudina ?

Kestio ya nene kele, nki beto fweti sala kana ntangu ya mpasi kwisa ? Mbala mgingi beto zola kubokuta. Keti kubokuta lunga na meso ya Nzambi ? Beto ta mona mvutu na lesosambu na beto bubuyai na Kutanga kapu 11.

❖ Developpement—Malongi ya Leso Yai na Banti 4 :

4.1 Bantu na kitini mosi ya camp ya Israele, bo vandaka kubokutilaka Nzambi, yo yina Nzambi pesaka bo ndola. Tiya yokaka camp na bo. Bu bo didilaka Moize, yandi sambaka Nzambi, ebuna tiya manaka.

❖ Tangila bana : . Kutanga 11 (Somere)

Kilumbu mosi, bantu ya Israele bokutilaka Mfumu Nzambi mpamba-mpamba. Ntangu Yandi waka yo, Yandi waka makasi. Yandi tindilaka bo tiya kuyoka kitini mosi ya camp.

Kutanga 11 :2

2 Bantu kwisaka kudidila Moize ngolo. Ebuna Moize sambaka Mfumu Nzambi. Na nima, tiya kufwaka.

❖ Yula bana :

❖ Bana sala bageste :

❖ Bana yimba ti kina :

4.2 Banzenza ya kwisaka nzila mosi ti bo bokutaka sambu bo waka nzala ya mbisi. Bantu ya Israele mpi landaka mbandu na bo. Nzambi vandaka na yo makasi, ti Moize zolaka kufwa sambu na kubokuta yina.

❖ Tangila bana : Kutanga 11 :4-15

4 Kilumbu mosi, banzenza yina vandaka kuzinga na kati ya bantu ya Israele, bo zolaka mingi kudia mbisi. Nkutu bo mosi bantu ya Israele yantikaka kubokuta nde : « A, kana beto vandaka na mbisi ya kudia !

6 ...beto me fwa kaka na kudia bima yai mana konso kilumbu.”...

10 Moize waka nde bantu vandaka bokutaka-bokutaka ... Mfumu Nzambi wilaka bo makasi

mpenza, ebuna mawa simbaka Moize.

Kubokuta na bo pesaka Moize mpasi ya ngolo, yo yina yandi sambaka Nzambi ngolo. Na mpasi na yandi, yandi bondilaka nde Nzambi kufwa yandi. Kansi yina vandaka lukanu ya Nzambi ve.

? Yula bana :

 **Bana sala bageste :**

 **Bana yimba ti kina :**

4.3 Sambu na bisambu ya Moize, Nzambi pesaka yandi bansadisi 70. Yandi tindaka mpi bandeke sambu bo kudia.

 **Tangila bana somere yai ya Kutanga 11 :16-30 :**

Nzambi monaka nde Moize vandaka na mfunu ya lusadisu, sambu kubokuta ya konso muntu kubwa ve kaka na zulu na yandi mosi. Nzambi songaka yandi kusola bambuta 70 ya lenda sadisa yandi na kisalu.

*31 Mfumu Nzambi tindaka mupepe ya ngolo...
Yo kwisaka kunata bandeke bonso bangwadi...
na konso lweka yo fulukaka...katuka ntoto ti na
zulu mpi yo fulukaka...*

32 Bantu yantikaka kulokuta bandeke yai...

? Yula bana :

 **Bana sala bageste :**

 **Bana yimba ti kina :**

4.4 Kansi Nzambi tindaka mpi maladi ya ngolo sambu na kubokuta na bo. Bantu mingi fwaka.

 **Tangila bana :** Kutanga 11 :33-34

33-34 Ntangu bantu ya Israele me manisa kudia mbisi yango ntete ve, Mfumu Nzambi wilaka bo makasi. Yandi tindilaka bo maladi ya ngolo mpenza... Po pana bo zikaka bantu yina . . .

? Yula bana :

 **Bana sala bageste :**

 **Bana yimba ti kina :**

>< Kumanisa Leso :

Nzambi kele na mpila kusadisa bantu na Yandi. Yandi sadisaka bantu ya Israele ntangu bo lombaka lusadisu na Yandi. Kansi Yandi vandaka ve na kiese na kubokuta na bo. Yo yina, Yandi pesaka bo ndola na mambu yina.

Keti nge banza nde bubu yai, Nzambi me balula mabanza na Yandi sambu na mambu yai ya kubokuta ? Ikele ve. Kana beto ke na mpasi, Nzambi zola beto kubokuta ve, kansi kulomba lusadisu na Yandi, sambu yina pesa Yandi lukumu.

Bana, bambuka : « Kusamba kaka, kubokuta ve ! (Bo repeter mbala 3 ti ritima.)

 **Devoir sambu na bakristo :**

Beno bakristo, keti beno lenda sala mposo mosi ya mvimba kukonda kubokuta ? Yina devoir mono ke pesa beno mposo yai. Kana mpasi kele, samba Nzambi. Na nima, kinga mvutu na Yandi, ti landa kaka kusamba, kansi kubokuta ve. Bana tuba mbala tatu diaka : “Kusamba kaka! Kubokuta ve!”

 **† Kubinga bana ya zaba Yesu ntete ve :**

Kansi kana nge me tula ntima na Yesus ntete ve, nge ta mona mpasi kusala devoir yai, sambu Mpeve na Nzambi kele kuzinga na kati ya nge ntete ve. Yo kele Yandi ya ke pesa bakristo ngolo kusala yina ya lenda pesa Nzambi kiese.

Kansi Nzambi zola kupesa nge Mpeve na Yandi. Yesu ke buyaka ve muntu ya kwisa na Yandi. Nge lenda binga Yandi konso ntangu na konso kisika ya nge kele. Songa Yandi nde nge bakisa nde nge me sala masumu, nde nge zola bika nzila yina. Songa Yandi nde nge kwikila Yandi, ti nge zola balula ntima. Kana nge binga Yandi na ntima na nge yonso, Yandi me sila nde Yandi ta buya nge ve.

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

==NSUKA YA LESO 4



Leso 4

**Beno kubokuta ve
mutindu bantu ya nkaka na
kati na bo bokutaka,
ebuna wanzio ya lufwa fwaka
bo.**

1 Korinto 10 :10

Leso 5. Miriami ti Aroni tongaka Moize.

I. Preparasio ya Moniteur—

Kutanga 12

◎ Kikuma ya lesos :

Bana ta tonga ve bantwadisi Nzambi me tula na zulu na bo, kansi bo ta zitisa bo.

♥ Verse ya kulonguka :

*Beno lemfuka/ na bambuta na beno ya Dibundu.
Beno wila bo mpi./ Bo ke langidilaka moyo na beno,/ sambu bo fweti futa rapore/ na Nzambi/
sambu na kisalu na bo/ ... Baebreo 13 :17a*

♥ Bankunga ya kwenda nzila mosi ti lesos :

O Keba Munoko Nki Nge Tuba (Kutonga ve !)

Nto Mosi (Verse 1 & 3)

II. Kusala Revisio—

- Na mposo me luta, beto monaka nde bantu ya Israele salaka nki mambu ya mbi ?
(Kubokuta.)
- Bo monaka ntangu ya mpasi. Mbote bo bokutaka ve, kansi bo salaka nki ?
(Kulomba lusadisu ya Nzambi.)

III. Kulonga Bana Leso Yai—

➔ Kuyantika Leso :

Longi na nzo-nkanda solaka Mazuzi sambu na kutala bana ya nzo-nkanda kana yandi fweti basika fioti. Mazuzi tulaka ngolo kusala mbote kisalu ya longi lombaka ya yandi. Kansi bana ya nkaka wilaka yandi kimpala. Bo yantikaka kutonga yandi. «Nge nani ? Nge banza nde nge kele muntu ya nene ? Nge kele mfumu na beto ? Wooo ! Mfumu !»

Kutonga yina pesaka Mazuzi mpasi mingi na ntima. Yandi lombaka longi kukatula yandi kisalu yina. Kutonga ya bana ya nkaka pesaka yandi mawa.

Bana, bana ya Israele mpi tongaka ntwadisi Nzambi me pesa bo—Moize. Nki mutindu beno banza

Nzambi monaka kutonga na bo ? Beto ta mona mvutu na lesosambu na beto bubuyai na Kutanga kapu12.

❖ Developpement—Malongi ya Leso Yai na Banti 4 :

5.1 Miriami ti Aroni vandaka kutonga Moize sambu yandi kwelaka nkento ya dikanda ya Kusani, ti Nzambi waka kutonga na bo.

BOOK Tangila bana : Kutanga 12 :1-2

1 Moize kwelaka muntu ya dikanda ya Kusani (nkento ndombe ya Afrika), ebuna Miriami ti Aroni tonga-tongaka yandi sambu na dibala yango.

2 Bo tubaka nde : « Keti Mfumu Nzambi me tuba kaka na Moize mpamba ? Keti Yandi me tuba na beto mpe ve ? » Mfumu Nzambi waka bo.

? Yula bana :

↑ Bana sala bageste :

↖ Bana yimba ti kina :

5.2 Nzambi bingaka bo tatu—Miriami, Aroni ti Moize, kutana na nzo ya bisambu. Kuna Yandi songaka bantu nde Yandi me sola Moize.

BOOK Tangila bana : Kutanga 12 :4-8

4-5 Nswalu Mfumu Nzambi tubaka na Moize, Aroni ti Miriami nde : « Beno yonso tatu, beno kwenda na Nzo-Nzambi... » Bo kwendaka, ebuna Mfumu Nzambi kwisaka kukulumuka ...Yandi bingaka Aroni ti Miriami. Bo kwisaka penepene.

6-7 Ebuna Mfumu Nzambi tubaka na bo nde : « Beno wa mbote mambu ya Mono ke songa beno....Moize muntu ya Mono ke tulaka ntima na kutala bantu na Mono Israele.

8 Mono ke tubanaka na yandi meso na meso. Mono ke tubilaka yandi pwelele. Mono ke kudisonga na yandi...Nki mutindu beno ke tina boma ve na kutonga-tonga muntu na Mono Moize ? »

? Yula bana :

↑ Bana sala bageste :

↖ Bana yimba ti kina :

5.3 Nzambi wilaka bo makasi,. Yo yina Yandi kumisaka Miriami lepre.

Tangila bana : Kutonga 12 :9-10

9-10 *Mfumu Nzambi wilaka bo makasi... Ebuna ... maladi ya lepre simbaka Miriami. Yo vandaka mpembe mpenza... Aroni talaka yandi. Yandi monaka nde bamputa me fuluka na mukanda ya nitu na yandi.*

? Yula bana :

† Bana sala bageste :

¶ Bana yimba ti kina :

5.4 Aroni lombaka pardo sambu na yandi ti Mariami, bo zole. Nzambi ndimaka kubelula Miriami, kansi Miriami fweti bikala na nganda ya camp bilumbu 7.

Tangila bana :

11 *Aroni tubaka na Moize nde : « Beto me sala mbi. Pardo...pesa beto ndola ve...sambu na mbi ya buzoba ya beto me sala ...*

13 *Ntangu yai, Moize didilaka Mfumu Nzambi nde : « Pardo, Nzambi, belula yandi. »*

14 *Mfumu Nzambi tubaka nde :...Mbote bo katula yandi na kati ya camp bilumbu 7, ebuna na nima bo lenda vutula yandi. »*

15-16 *Bo katulaka Miriami na kati ya camp bilumbu 7. Bantu ya Israele simbaka nzila ve tii kuna Miriami vutukaka na kati ya camp. Na nima bo katukaka...*

>|< Kumanisa Leso :

Nzambi waka kutonga ya Miriami ti Aroni. Yandi ke wa kutonga na beto mpi. Yandi songaka nde Yandi vandaka na kiese ve na kutonga ya Miriami ti Aroni. Yandi pesaka ndola ya ngolo. Mbote beto bakristo kutonga ve bantu ya ke tula ngolo kutwadisa beto.

Beto tula bo na bisambu. Beto songa bo luzitu. Yai

ta pesa Nzambi kiese.

¶ Yimba nkunga yai :

O Keba Munoko Nki Nge Tuba (Kutonga ve !)

₩ Devoir sambu na bakristo :

Na mposo yai, mono ke lomba beno bakristo kutula ngolo kuzitisa bantwadisi na beno, kansi kutonga bo ve.

♥ Verse ya kulonguka :

Beno lemfuka/ na bambuta na beno ya
Dibundu,/beno wila bo mpi./ Bo ke langidilaka
moyo na beno,/ sambu bo fweti futa rapore/ na
Nzambi/ sambu na kisalu na bo/ ... Baebreo 13 :17a

Kabisa bana na bandambu 7. Konso ndambu ya bana ta telama ti tuba phrase mosi ya verse. Bana yonso ta tuba adresse. Sala mpidina mbala tanu. Na nsuka, bo yonso tuba verse ya mvimba.

† Kubinga bana ya zaba Yesu ntete ve :

Kana nge me tula ntima na Yesu ntete ve, zaba nde, nsuka to lufutu ya masumu kele lufwa. Beto yonso me sala masumu. Yo yina, beto ke lunga kubaka lufwa mvu ya mvu. Kansi Nzambi tindaka Mwana na Yandi ya kitoko, Yesu Kristo, sambu Yandi kufwa na sika na beto. Ntangu Yesu fwaka, Nzambi ndimaka menga na Yandi bonso lufutu ya masumu na beto. Kana beto tuba “ee,” na Yesu, Nzambi tanga menga na Yandi bonso lufutu ya me lunga. Yesu mpi telamaka na lufwa. Bubu Yandi lenda gulusa nge kana nge ta tula ntima na Yandi. Kana nge zola bika nzila ya masumu ti ndima Yesu bubu, bikala na nima ya ecodim, sambu beto lenda sadisa nge.

Kana ntangu kulunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

====NSUKA YA LESO 5

Leso 5 & 7

**Beno
lemfuka
na
bambuta
na beno ya
Dibundu.**

Beno wila bo mpi.

**Bo ke langidilaka moyo na
beno,
sambu bo fweti futa rapore na
Nzambi sambu na kisalu na bo**

...

Baebreo 13 :17a

Leso 6. Bantu ya Israele tindaka baespion, ebuna bo buyaka kukota nsi ya Kanana.

I. Preparasio ya Moniteur—

Kutanga 13-14

◎ Kikuma ya lesos :

Bana ta tula ngolo kukwikila mpi kulemfuka na ndinga ya Nzambi.

♥ Verse ya kulonguka :

Beno wa nsangu ya Nzambi/ kaka na kuwa mpamba ve,/ sambu kana beno ke sala mpidina,/ beno ke kudikusa./ Kansi sala mambu ya Ndinga ya Nzambi ke longa./ Yakobo 1 :22

↖ Bankunga ya kwenda nzila mosi ti lesos :

Kuwa Bible, verse ya nsuka

II. Kusala Revisio—

- Na lesos me luta, beto monaka nde Miriami ti Aroni, bambuta ya Moize ya mama mosi ti yandi, bo vandaka kutonga yandi. Nzambi waka yo, ti Yandi vandaka na yo kiese ve. Yo yina, Yandi pesaka Miriami ndola ya maladi ya lepre bilumbu 7. Na nima, bana ya Israele landaka voyage na bo diaka kukwenda na nsi ya Kanana ya Yandi silaka ntama na bankaka na bo.

III. Kulonga Bana Leso Yai—

→ Kuyantika Leso :

Bubu yai, beto ta mona nde bantu ya Israele kwisaka na ntoto ya Nzambi silaka bo. Ntangu lungaka nde bo kota ! Bo me vingila lumbu yina bamvula mingi. Nki ta salama ntangu yai ? Keti bo ta kota ?

❖ Developpement—Malongi ya Leso Yai na Banti 4 :

6.1 Nzambi songaka Moize kutinda bantu kutala ntoto ya Kanana na ntwala bo kota. Yo

yina, Moize tindaka bantu 12—muntu mosi ya konso tribu, bo pesa rapore nki mutindu ntoto.

BOOK Tangila bana : Kutanga 13 :1-18

1-2 *Mfumu Nzambi tubaka na Moize nde : Tinda bantu kukwenda kutala ntoto ya Kanana ya Mono ke pesa na bantu ya Israele. Na konso dikanda, beno sola muntu mosi kutinda.*

17-18 *Ntangu Moize zolaka kutinda bo, yandi tubaka na bo nde : « Beno kota na nsi ya Kanana ...beno tala mbote mutindu ntoto kele... »*

? Yula bana :

↑ Bana sala bageste :

↖ Bana yimba ti kina :

6.2 Bantu yina talaka ntoto ya Kanana bilumbu 40. Ebuna bo vutukaka. Bantu 10 vutulaka rapore ya boma. Kansi Yozue ti Kalebi ndimaka nde bo kota.

BOOK Tangila bana : Kulonga 13 :21-33

21 *Bantu yai kwendaka. Bo talaka ntoto...*

25 *Na nima ya bilumbu 40...bo kwisaka kuvutuka.*

26 *Bo kwisaka kukuta Moize, Aroni ti bantu yonso ya Israele... Bo telaka bo mambu yonso ya bo monaka. Bo songaka bo mpi bambuma ya bo nataka na ntoto yina.*

27 *Mambu ya bo tubaka na Moize, yo yai : “...Beto me mona nde yo kele ntoto mosi ya mbote mpenza, ti ya nene, yo kele mpi na bima mingi ya kudia.*

28 *Kansi kima mosi, bantu ya ntoto yina kele ngolo mingi... nene-nene ti ya nda-nda...*

30 *Kalebi songaka bantu yina vandaka kutonga-tonga Moize na kuvanda nie. Yandi tubaka nde : “Beto kwendeno. Beto me kuka, beto ta botula ntoto na bo.”*

31-33 *Kansi banduku na yandi tubaka nde : « Beto lenda ve kunwanisa bantu yai. Bo me luta beto na ngolo.”*

? Yula bana :

↑ Bana sala bageste :

↖ Bana yimba ti kina :

6.3 Bantu yonso dilaka ti bokutilaka Moize. Bo zolaka vutuka na Ezipte.

 **Tangila bana :** Kutanga 14 :1-5

1 Bantu yonso ya Israele telamaka. Bo yantikaka kutula makelele. Bo dilaka mpimpa ya mvimba.

2 Bo yonso bokutilaka Moize ti Aroni nde : “A sambu na nki beto fwaka ve na nsi ya Ezipte, to awa na ntoto ya zelo na zelo ?

4 Bo yantikaka kutuba bo na bo nde : “Beno tula mfumu ya nkaka. Beto vutukeno na Ezipte.”

5 Ntangu yai, Moize ti Aroni bwaka ilungi na ntoto na meso ya bantu yonso.

? Yula bana :

↑ Bana sala bageste :

↖ Bana yimba ti kina :

6.4 Ata Yozue mpi bondilaka bo kukwikila Nzambi, kukota nsi ya Kanana, bo zolaka ve. Nzambi vandaka makasi, kansi Moize sambilaka bo Nzambi. Yo yina Nzambi fwaka bo ve, kansi pesaka bo ndola.

 **Tangila bana :** Kutanga 14 :7-39

Yozue ti Kalebi...7-8...tubaka na bantu yonso nde : “... Nzambi...ta pesa beto yo.

9 Kima mosi, beto sala ve mubulu na Mfumu Nzambi. Beto tina mpi ve bantu ya ntoto yina boma.... Mfumu Nzambi kele na beto. Beno tina bo boma ve.”

10 Bantu yonso zolaka nde bo losa-loса Yozue ti Kalebi matadi sambu na kufwa bo, kansi lukumu ya Mfumu Nzambi kwisaka kumonika... na Nzo-Nzambi ya ntenta.

11 Mfumu Nzambi tubaka na Moize nde : « Tii nki ntangu bantu yai ta bika kufinga Mono ?

Keti bo ta buya kaka konso ntangu utula Mono ntima, ata Mono me sala bidimbu mingi na meso na bo... ?

13, 19-20 Kansi Moize tubaka na Mfumu Nzambi nde :...Mfumu Nzambi, wila bantu yai mawa sambu na masumu na bo...sambu Nge kele ya mawa.” Mfumu Nzambi tubaka nde : « Mono me lolula bo mutindu nge me lomba.

21-23 ...Mono...Nzambi...me zenga nde...bantu yai...sambu bo buyaka kulemfuka na Mono, yo yina, ata muntu mosi ve na kati na bo ta kota na ntoto ya Mono tubaka...Mono ta pesa bo...

30-32 ...kaka Kelebi...ti Yozue...bantu ta kota muna... Beno ta fwa awa na ntoto yai ya zelo na zelo.

33 Kansi bana na beno, bo mpi ta baka ndola ya mubulu na beno. Bo ta tambula-tambula na ntoto yai...bamvula 40, tii kuna beno bambuta beno yonso kufwa.

36-38 Bantu yina ya Moize tindaka na kwenda kutala ntoto...Mfumu Nzambi kufwaka bo na maladi ya ngolo. Kaka Yozue ti Kalebi bikalaka na moyo.

? Yula bana :

↑ Bana sala bageste :

↖ Bana yimba ti kina :

>< Kumanisa Leso :

Tuka ntama, Nzambi silaka bankaka ya Israele nde Yandi ta pesa bo ntoto ya Kanana. Yandi me sila yo diaka ti diaka. Ntangu bantu yai 12 kwendaka kutala yo, yo pesaka okasio ya mbote ya bo lenda ndima nde Nzambi ta lungisa yina ya Yandi silaka. Kansi bo kwikilaka Yandi ve. Rapore ya Yozue ti Kalebi, yo kwendaka nzila mosi ti ndinga ya Nzambi me tuba tuka ntama. Kansi bantu kwikilaka yo ve.

Yo yina, Nzambi buyaka nde ntangu yina, bo kota ntoto ya Yandi zolaka kupesa bo. Yandi pesaka ndola ya ngolo. Bo fweti tambula na nseke bamvula 40 diaka, tii ntangu bantu yonso kufwa ya kwikilaka ve ndinga ya Nzambi.

Bana, Nzambi ke tuba masonga. Yandi ke salaka yina ya Yandi ke silaka. Mbote beto kwikila ndinga na Yandi.

Verse ya Kulonguka :

Beno wa nsangu ya Nzambi/ kaka na kuwa mpamba ve,/ sambu kana beno ke sala mpidina,/ beno ke kudikusa./ Kansi beno fweti sala mambu/ ya Ndinga ya Nzambi/ ke longa./ Yakobo 1:22

Bana tanga verse fraze na fraze mbala zole. Mwana mosi tendula mpila bantu ya Israele vandaka kuwa mpamba, vandaka kudikusa.

Na nima vukisa na bafraze zole kaka. Bana bakala tuba fraze ya ntete, ti bana bankento fraze ya zole. Sala mpidina mbala zole. Na nima, balula yo ti bana bankento tuba fraze ya ntete ti bana bakala fraze ya zole. Na suka, bo yonso tuba yo.

Devoir sambu na bakristo :

Bubuyai ndinga ya Nzambi ke monika na kati ya Bible. Devoir mono ke pesa beno bakristo mposo yai, yo yai : kutanga to kuwa konso lumbu Ndinga ya Nzambi. Tula ngolo kukwikila yina ya nge kuwa. Na nima, tula ngolo mpi kulemfuka na yina ya nge me wa.

✚ Kubinga bana ya zaba Yesu ntete ve :

Kana na kati na beno kele bana ya me guluka ntete ve, ndinga ya Nzambi ke songa beto nki mutindu beto lenda guluka. Yo ke tuba mutindu yai :

« Kana nge ke ndimaka na munoko na nge na meso ya bantu yonso nde : « Yesu kele Mfumu », ti kana nge ke kwikilaka na kati ya ntima ya nge nde Nzambi tedimisaka Yandi na lufwa, nge ta guluka. (Roma 10:9)

Yindula nsilulu ya Nzambi me pesa : Nge TA GULUKA. Kiese ! Keti nge me bakisa nde nge kele na mfunu na Ngulusi ? Keti nge me kwikila na ntima na nge ? Kana nge zola solula mambu yai sambu beto sadisa nge, bikala na nima ya ecodim. Beto ta vanda na kiese kusadisa nge kumona nki ndinga ya Nzambi ke tuba.

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

==NSUKA YA LESO 6



Leso 6

Ntoto ya Kanana
me fuluka na
madia ya mbote,
kansi kaka Yozue
ti Kalebi zolaka
nde bo kota.

**Beno wa nsangu ya Nzambi kaka
na kuwa mpamba ve,
sambu kana beno ke sala mpidina,
beno ke kudikusa.
Kansi sala mambu ya Ndinga ya
Nzambi ke longa.**

Yakobo 1 :22

Leso 7. Kore salaka rebelio kunwanisa Moize.

I. Preparasio ya Moniteur—

Kutanga 16

◎ Kikuma ya lesos :

Bana ta zitisa bantwadisi Nzambi me tula na zulu na bo ti sambila bo Nzambi. Bo ta sala bo mubulu ve.

♥ Verse ya kulonguka :

(Verse kiteso mosi na Leso 5)

Beno lemfuka/ na bambuta na beno ya Dibundu.

Beno wila bo mpi./ Bo ke langidilaka moyo na

beno,/ sambu bo fweti futa rapore/ na Nzambi/

sambu na kisalu na bo/ ... Baebreo 13 :17a

♣ Bankunga ya kwenda nzila mosi ti lesos :

O Keba Munoko Nki Nge Tuba (Kutonga ve !)

Sambila Bantwadisi Nzambi

II. Kusala Revisio—

- ▶ Na lesos me luta, beto monaka nde bantu ya Israele rataka ngolo. Bo rataka nki mutindu ? (Bo buyaka kukota nsi ya Kanana ya Nzambi silaka bo.)
- ▶ Sambu na nki bo rataka ?
(Bo vandaka na boma. Yo yina, bo kwikilaka ve nsilulu ya Nzambi nde Yandi ta pesa bo nsi yina.)
- ▶ Nki vandaka ndola Nzambi pesaka ?
(Bo fweti tambula mpamba-mpamba na sika ya zelo na zelo mingi diaka, tii bo yonso kufwa ya kwikilaka Nzambi ve. Bantwadisi ya kwikilaka ve, bo mpi fwaka na maladi kaka po pana.)
- ▶ Bantu zole kwikilaka, yo yina Nzambi tubaka nde bo ta zinga tii bo ta kota ntoto Nzambi silaka bo. Bo banani ? (Yozue ti Kalebi)

III. Kulonga Bana Leso Yai --

➔ Kuyantika Leso :

Mbala mingi kana beto me bwa, beto zola ve kundima yo, kansi beto zola kufunda muntu ya nkaka. Bantu ya Israele mpi salaka mpidina. Bo

rataka kukota na ntoto na bo, sambu bo kwikilaka ve ndinga ya Nzambi me tuba nde Yandi ta pesa bo yo. Bo mosi bantu salaka mbi. Kansi bo fundaka nani na mambu yina ? Beto ke mona mvutu na Kutanga kapu 16.

❖ Developpement—Malongi ya Leso Yai na Banti 4:

7.1 Kora ti bambuta ya nkaka salaka mubulu kutuba nde Moize me kudinangula, me kuditula ntwadisi yandi mosi.

BOOK Tangila bana : Kutanga 16 :1-3

1 Kore....kumaka ntu-ngolo. Yandi ti Datani ti Abirami...bo salaka mubulu na Moize.

Bambuta 250...kwisaka kuyukana na bo sambu na kusala mubulu na Moize.

3 Bo kwisaka kutelama na meso ya Moize ti Aroni. Bo ...nde : « Ya kieleka, beno me lutisa. Beto yonso kele... bantu ya Nzambi... Sambu na nki beno ke kudimona nde beno me luta bantu ya nkaka ...? »

? Yula bana :

↑ Bana sala bageste :

♣ Bana yimba ti kina :

7.2 Moize bingaka bo kutesa nani Nzambi me sola kuvanda ntwadisi. Kansi bantu zole buyaka kukwisa. Bo landaka mubulu na bo diaka.

BOOK Tangila bana : Kutanga 16 :4-14

4 Ntangu Moize waka mpidina, yandi bwaka ilungi na ntoto, yandi sambaka Nzambi.

5-7 Ebuna yandi tubaka na Kore ti bantu na yandi nde : « Mbasi na suka Mfumu Nzambi ta songa beto...kana nani Yandi ta sola... »

9-11 Keti yo kele kima ya fioti... Nzambi ya Israele solaka beno na kati ya bantu ya Israele ... kusala kisalu ya Nzo-Nzambi ya ntenta...? ...Beno ke sala mubulu na Mfumu Nzambi !”

12-14 ...Moize tindaka bantu kubinga Datani ti Abirami, kansi bo pesaka mvutu nde : ... “Ntete

*nge basisaka beto na nsi ya Ezipte...sambu na kwisa kufwa beto awa na ntoto ya zelo na zelo.
...Ebuna ntangu yai, nge ke zola diaka kukuma mfumu na beto na kingolo-ngolo ? ...Beto ke kwisa ve !”*

? Yula bana :

! Bana sala bageste :

¶ Bana yimba ti kina :

7.3 Moize bingaka bo yonso. Ebuna Nzambi songaka bantu kukatuka, kuvanda penepene ve na bantenta ya bantu ya twadisaka rebelio.

Tangila bana : Kutanga 16 :16-30

16-18 Moize tubaka na Kore nde : « Mbasi nge ti bantu na nge ...kwisa kutelama na meso ya Mfumu Nzambi.... Moize ti Aroni bo mpi kwisaka.

*19-21 Ntangu yai....Mfumu Nzambi kwisaka kumonika na meso ya bantu yonso. Mfumu Nzambi tubaka na Moize ti Aroni nde :
«...Katuka na kati ya bantu yai. Mono ke fwa bo sesepi yai. »*

*25...Moize tubaka na bantu ya Israele nde :
“Beno katuka penepene na...ntenta ya bantu yai ya masumu ...*

27 Ebuna bantu katukaka penepene na bantenta ya Kore, Datani ti Abirami....

28 Moize tubaka na bantu nde : « Ntangu yai, beno ta mona nde, ya kieleka Mfumu Nzambi tindaka mono, ti mono ke sala ve na luzolo na mono mosi.

30...Kana Mfumu Nzambi sala... na mpila nde ntoto kukanguka kumina bantu yai ti bima na bo yonso...mpidina beno ta zaba nde bo me finga Mfumu Nzambi.”

? Yula bana :

! Bana sala bageste :

¶ Bana yimba ti kina :

7.4 Nzambi kangulaka ntoto sambu yo mina bantu yina ti bima na bo yonso--ndola ya ngolo !

Tangila bana : Kutanga 16 :31-35

31-32 Ntangu Moize manisaka na kutuba, ntoto pasukaka na nsi ya makulu ya Datani, ti Abirami. Yo kangukaka, yo minaka bo...ti bantu ya Kore, ti bima na bo yonso.

35 Bantu 230 ya landaka bo...tiya katukaka na Mfumu Nzambi ti yokaka bo.

? Yula bana :

! Bana sala bageste :

¶ Bana yimba ti kina :

>|< Kumanisa Leso :

Histoire mosi ya mawa ! Yonso sambu bantu salaka mubulu na bantwadisi ya Nzambi me tula. Kisalu Moize ti Aroni vandaka ngolo ti mpasi. Nzambi zolaka nde bantu zitisa bantwadisi Yandi me tula, bo landa bo na luzitu. Beto mpi bubuyai, Bible ke songa beto nde beto sala mubulu ve, kansi beto zitisa bantwadisi ya Nzambi pesa beto.

♥ Verse ya Kulonguka :

Bana tuba verse diaka: Bana ya ke lwata bacouleur mutindu na mutindu tuba verse : Mbandu, bo ya ke lwata ndombe, etc. Na nima, bana tesa kutuba yo mosi-mosi.

Devoir sambu na bakristo :

Beno ya zaba Yesu dezia bonso Mvulusi ti Mfumu na beno, devoir mono ke pesa beno mposo yai kele kutula ngolo kuzitisa bamfumu ya Nzambi me tula na zulu na beno. Bamfumu to bantwadisi kele konso muntu ya Nzambi me pesa kiyeka kuyala to kutwadisa. Bantu yai kele bonso nani sambu na beto ? (Bibuti, balongi ya nzo-nkanda, pasteur, mfumu ya bwala, bamfumu ya leta, etc.)

† Kubinga bana ya zaba Yesu ntete ve :

Beto yonso me sala mbi na meso ya Nzambi. Beto kele na mfunu ya Mvulusi. Keti nge zaba Yesu bonso Mvulusi na nge ? Kana nge me yamba Yandi ntete ve, zaba nde, kana nge kufwa kukonda kuzaba Yandi, ndola ya kuluta mpasi ta kinga nge. Kansi Nzambi zola ve kupesa nge ndola. Yandi zola

kuwila nge mawa. Kana nge ta balula ntima ti kwikila na Mwana na Yandi Yesu Kristo, Yandi ta yamba nge na kiese ! Kana nge ke na mfunu ya lusadisu kutula ntima na Yesu, beto ta vanda awa na nima ya ecodim bubuyai sambu na kusadisa nge.

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

==NSUKA YA LESO 7

Leso 7—Verse kiteso mosi na Leso 5.



*Beno
lemfuka
na
bambuta
na beno
ya*

Dibundu.

Beno wila bo mpi.

*Bo ke langidilaka moyo na
beno, sambu bo fweti futa
rapore na Nzambi sambu na
kisalu na bo... Baebreo 13 :17a*

Leso 8. Bantu waka makasi na Moize diaka.

I. Preparasio ya Moniteur—

Kutanga 17 :6-26

◎ Kikuma ya lesos :

Bana ta vanda na makasi na Nzambi to na muntu ya nkaka ve sambu na mambu ya zoba ya bo mosi me sala. Kansi bo ta ndima mbi na bo ti lomba Nzambi kuvutula bo na nzila.

♥ Verse ya kulonguka :

Bantu ya nkaka ke kudisosilaka bampasi/ na mambu na bo ya buzoba. Kansi,/ bo ke wilaka Mfumu Nzambi makasi./ Bingana 19 :3

♣ Bankunga ya kwenda nzila mosi ti lesos :

Kudikulumusa na Meso ya Nzambi
Mo' Ta Kwisa na Nzambi na Lulendo Ve (Verse ya sole—Mo' Ta Ndima Mbi Yonso ya Mono Sala)

II. Kusala Revisio—

➤ Na baleso na beto, bantu ya Israele vandaka kubwa na disumu mosi diaka ti diaka. Nki disumu yina ? (Ee, kubokuta, to kutonga bantwadisi ya Nzambi me pesa bo.) Nzambi me pesa bo ndola ya ngolo. Bubuyai beto ta mona kana bo me baka mayele na mambu yina to ve.

III. Kulonga Bana Leso Yai—

➔ Kuyantika Leso :

Mono waka histoire ya mwana zina ya Mambu. Lumbu mosi, yandi vandaka kusakana. Yandi kudiyulaka nde, "Nki mutindu yo ta vanda kuvanda na kati ya tiya ? Ebuna yandi kudilosaka na tiya. Mpasi mingi ! Kansi yandi ntu-ngolo mingi. Na nima ya bilumbu, yandi salaka yo diaka. Mpasi mingi diaka. Mpusu katukaka, mpasi mpila ve bilumbu mingi. Keti beno banza nde yandi ta sala yo diaka ?

Beto lenda tuba nde bantu ya Israele mpi vandaka ntu-ngolo. Mbala mingi bo vandaka bokuta, bo vandaka kutonga bantwadisi na bo. Ata Nzambi me

sadisa bo na mambu mingi, bo yindulaka ve kulomba lusadisu na Yandi. Nzambi pesaka bo ndola ya ngolo. Keti bo ta longuka, to bo ta landa kaka na ntu-ngolo na bo ?

❖ Developpement—Malongi ya Leso Yai na Banti 4 :

8.1 Bantu vandaka kutonga Moize ti Aroni, kutuba nde bo me fwa bantu ya Nzambi. Ebuna Nzambi songaka makasi na Yandi na bantu ya vandaka kutonga bantwadisi Yandi me tula.

❖ Tangila bana : Kutanga 17 :6-10a

6 Na kilumbu ya kulanda, bantu yonso ya Israele bokutilaka Moize ti Aroni nde : « Beno me fwa bantu ya Mfumu Nzambi ! »

7b-8 Moize ti Aroni talaka na ndambu ya Nzo Nzambi ya ntenta...bo monaka nde...lukumu ya Mfumu Nzambi me monika. Bo kwendaka kutelama na ntwala ya Nzo-Nzambi ya ntenta,

9-10a Ebuna Mfumu Nzambi tubaka na Moize nde : « Beno katuka na kati ya bantu yai... Mono ke fwa bo na mbala mosi ! »

❓ Yula bana :

↑ Bana sala bageste :

♣ Bana yimba ti kina :

8.2 Nzambi tindaka ndola ya maladi ya ngolo. Yo yina, Moize ti Aroni sambilaka bantu Nzambi, ti Yandi wilaka bo mawa.

❖ Tangila bana : Kutanga 17 :10c-11

10c-11 Moize ti Aroni bwaka ilungi na ntoto, ebuna Moize tubaka na Aroni nde : "...Sala kidimbu yina ke songa nde Mfumu Nzambi fweti lolula bantu yai sambu na masumu ya bo me sala. Sasuka si, Mfumu Nzambi me wa makasi, maladi ya ngolo mpenza me kota ! »

12 Aroni salaka mutindu Moize tubaka. ...Yandi salaka kidimbu sambu Nzambi kulolula bantu ya Israele. 13...maladi kumanaka.

14 Ntalu ya bantu yina kufwaka vandaka
14,700...

?

Yula bana :

!

Bana sala bageste :

¶

Bana yimba ti kina :

8.3 Nzambi songaka Moize nde makanda yonso tula banti ya kimfumu na bo na ntwala ya Nzambi. Nzambi nde, nti ya dikanda Mono me sola ta basisa matiti sambu na kusonga Mono me sola nani.

Tangila bana : Kutanga 17 :16-19

16-17 Mfumu Nzambi tubaka na Moize nde : « Songa bantu ya Israele nde mfumu ya konso dikanda fweti pesa nge nti ya kutambudila... Nge ta baka banti...nge ta sonika zina ya muntu yina ke nata yo.

18 Kansi na zulu ya nti ya dikanda ya Levi nge ta sonika zina ya Aroni. Mpidina konso mfumu ya dikanda ta vanda na nti mosi.

19 Nata banti yai na Nzo-Nzambi... Tula yo na ...kisika ya Mono ke kutanaka na beno.

?

Yula bana :

!

Bana sala bageste :

¶

Bana yimba ti kina :

8.4 Makanda yonso ya Israele tulaka banti na bo ya Kimfumu. Na nima, Moize songaka bo yonso nde nti ya Aroni me mena.

Tangila bana : Kutanga 17 :23-26

23 Na kilumbu landaka, ntangu Moize kwisaka kukota na Nzo-Nzambi, yandi monaka nde, nti ya Aroni pesaka sambu na dikanda ya Levi, yo me mena. Yo me basisa matiti ti bintuntu. Yo mpi me basisa bambuma ya kuyela.

24 Moize bakaka banti yonso... yandi kwendaka kusonga yo na bantu ya Israele...

25 Mfumu Nzambi tubaka diaka na Moize nde : « Vutula nti ya Aroni na nzo-Nzambi. Yo fweti

bikalaka kuna sambu na kupesa atasio na bantu ya mubulu... Ebuna bo ta fwa diaka ve. »

26 Moize salaka mambu yonso kaka mutindu Mfumu Nzambi songaka yandi.

?

Yula bana :

!

Bana sala bageste :

¶

Bana yimba ti kina :

>|< Kumanisa Leso :

Bantu ya Israele vandaka kumona mpasi sambu bo mosi me sala mbi ti Nzambi mosi me pesa bo ndola. Kansi bo vandaka kubokuta bonso bantwadisi na bo me pesa bo ndola. Bo monaka mpasi kundima mbi na bo.

Bana, kana beto me sala mbi, beto ndima yo, beto bika yo, beto lomba Nzambi nkenda. Beto funda ve bantu ya nkaka. Beto tuba ve nde, ‘O, mono ke mona mpasi sambu muntu me loka mono.’ Beto lomba Nzambi Yandi songa beto kana beto me sala mbi. Kana Yandi songa beto, beto ndima ti bika yo.

Devoir sambu na bakristo :

Beno bakristo, devoir mono ke pesa beno mposo yai, yo yai : kuyindula konso lumbu nki mbi nge mosi me sala, ebuna kundima yo, kusosa ndolula ya Nzambi. Yandi ta lolula kana nge ndima mbi na nge na kieleka.

Verse ya Kulonguka :

Bantu ya nkaka ke kudisosilaka bampasi/ na mambu na bo ya buzoba,/ ebuna na nima,/ bo ke wilaka
Mfumu Nzambi makasi./ Bingana 19:3

Bana tanga verse mbala zole. Mwana mosi songa mpila bana ya Israele kudisosilaka bampasi na mambu ya bo ya buzoba.

Na nima, tula yo ton ti ritime ti twadisa bana kuyimba yo. Bana repeter konso fraze na nima ya nge.

Kubinga bana ya zaba Yesu ntete ve :

Kana nge me yamba Yesu na ntima na nge ntete ve, nge me kuma mukristo ntete ve. Nge me bikala na

masumu na nge, rebele na camp ya Satana. Kansi bubuyai nge lenda yamba Yandi. Bubuyai Yandi lenda lolula masumu na nge, katula nge na camp ya Satana ti tula nge na camp ya Nzambi.

Yesu me fwa na zulu ya kulunsi sambu na kubaka ndola yonso ya Nzambi zola kupesa beto barebele, beto bantu ya masumu. Yandi telamaka na lufwa sambu Tata Nzambi ndimaka makabu Yandi pesaka. Kana nge me yamba Yesu ntete ve, to kana nge zaba yo mbote-mbote ve, kansi bubuyai nge zola kubalula ntima na Yandi, kuyamba Yandi bonso Mvulusi na nge, bikala na nima ya ecodim. Beto ta vanda na kiese kusadisa nge.

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

====NSUKA YA LESO 8

Leso 8



*Bantu
ya
nkaka
ke kudisosilaka bampasi na
mambu na bo ya buzoba.
Kansi, bo ke wilaka Mfumu
Nzambi makasi.*

Bingana 19 :3

Leso 9. Makasi bendaka Moize kusala mbi, ti Miriami ti Aroni kufwaka na nseke.

I. Preparasio ya Moniteur—

Kutanga 20

◎ Kikuma ya lesos :

Bana ta sala atasio kuyala makasi na bo na lusadisu ya Nzambi, sambu bo ta bakisa nde, kana bo yala yo ve, yo lenda benda bo kusala mambu mingi ya mbi.

♥ Verse ya kulonguka :

Kana beno me wa makasi,/ beno keba./ Mbaimbai yo ta benda beno/kusala masumu/...Efezo 4 :26a

Bankunga ya kwenda nzila mosi ti lesos :

Kana Nge Me Wa Makasi

Mo' ta Kwisa na Nzambi na Lulendo Ve (verse 3—

Mo' ta Kwisa na Nzambi na makasi ve)

O Kebe Ntima Nki Nge Kuwa (Makasi ve)

II. Kusala Revisio—

¶ Mbala mingi beto me mona bantu tonga bantwadisi ya Nzambi me tula na zulu ya bo. Mbala mingi, ntangu yina, bo sala mubulu na kimpala na bo. Yo yina, Nzambi salaka kidimbu sambu na kusonga pwelele nani Yandi me sola kutelama na ntwala na Yandi. Nani lenda songa beto nki kidimbu Nzambi salaka ? (Yandi songaka makanda yonso kupesa nti ya dikanda na bo. Moize tulaka banti yonso na ntwala ya Nzambi. Na suka bo monaka nde nti ya Aroni me basisa matiti, bintuntu ti bambuma. Yai songaka nde Nzambi me sola yandi kutwadisa banganga Nzambi.)

III. Kulonga Bana Leso Yai—

➔ Kuyantika Leso :

Keti nge me mona muntu ya salaka mambu na makasi, ebuna na nima, yandi yulaka, « Ai ! Nki mono me sala ? Sambu na nki mono salaka mpidina ? »

Mono waka nde nkento mosi vandaka na mulangi mosi ya kitoko—makabu ya bakala na yandi. Yandi zolaka yo mingi, ti yo pesaka yandi kiese konso ntangu yandi talaka yo. Lumbu mosi, mwana na yandi salaka mambu ya pesaka yandi makasi mingi. Nkento simbaka mulangi yina. Yandi losaka yo na briki ya simante. Yo pasukaka na bitini-bitini. Na nima, yandi dilaka ngolo. Yandi dilaka nde : “A, nki mono me sala ? Sambu na nki mono me sala mpidina ?”

Beto zaba nde Moize vandaka muntu ya Nzambi. Nzambi solulaka ti yandi na mpila ya Yandi salaka ve ti bantu ya nkaka. Kansi na lesosambu na beto bubu, beto ta mona nde makasi simbaka Moize. Beto ta mona nki mambu ya mawa landaka yo.

❖ Developpement—Malongi ya Leso Yai na Banti 4 :

9.1 Na nima Miriami fwaka, bantu tongaka Moize ti Aroni diaka sambu masa vandaka ve.

BOOK Tangila bana : Kutanga 20 :1-5

1 ...Bantu yonso ya Israele....telamaka na bwala Kadeshi. Miriami kufwaka po pana, ti bo zikaka yandi kuna.

2 Masa vandaka kuna ve. Yo yina, bantu kwisaka kuziunga Moize ti Aroni sambu na kutonga bo.

3 Bo yantikaka kuswanisa Moize nde : « A kana beto fwaka ka beto nzila mosi ti bampangi na beto...! »

4 Sambu na nki nge me kwisa kunata beto...na ntoto ya zelo na zelo mpidiyai sambu beto ti bambisi na beto, beto kufwa ?

5 Sambu na nki nge basisaka beto na nsi ya Ezipite mpasi-mpasi ? .(Kutonga, kutonga, kutonga...)

? Yula bana :

↑ Bana sala bageste :

↖ Bana yimba ti kina :

9.2 Moize ti Aroni sosaka Nzambi, ebuna Yandi songaka bo nki mutindu bo lenda kuzwa masa.

Tangila bana : Kutanga 20 :6-9

6 *Moize ti Aroni...kwendaka na munoko ya Nzo-Nzambi ya ntenta. Kuna bo bwaka ilungi na ntoto. Ebuna lukumu ya Mfumu Nzambi kwisaka kumonika na bo.*

7-8 *Mfumu Nzambi tubaka na Moize nde : « Baka nti na nge. Nge ti mpangi na nge Aroni, beno binga bantu ya Israele kukwisa kutana sika mosi. Na meso na bo, beno tuba na ditadi yina kele kuna, ebuna masa ta basika...»*

9 *Moize kwendaka kubaka nti yina vandaka na Nzo-Nzambi ya ntenta, mutindu Mfumu Nzambi songaka yandi.*

? Yula bana :

Bana sala bageste :

Bana yimba ti kina :

9.3 Sambu na makasi, Moize salaka yo ve mutindu Nzambi me tuba. Yandi pesaka Nzambi lukumu mpi ve.

Tangila bana : Kutanga 20 :10-11

10 *Yandi ti Aroni bingaka bantu yonso na kwisa kutelama na ntawala ya ditadi yango. Moize tubilaka bo nde : « Beno wa, beno bantu ya mubulu ! Keti beto fweti basisa masa na ditadi yai sambu na beno ? »*

11 *Moize bakaka nti na yandi. Yandi bulaka ditadi mbala zole. Na mbala mosi, masa basikaka mingi. Ebuna bantu ya Israele nwaka, ti bambisi na bo.*

? Yula bana :

Bana sala bageste :

Bana yimba ti kina :

9.4 Nzambi vandaka na yo kiese ve sambu Moize salaka ve kaka na mutindu Yandi me songa yandi kusala. Yo yina, Yandi buyaka nde Moize ti Aroni kota ntoto ya Yandi me silaka kupesa na bantu ya Israele.

Tangila bana : Kutanga 20 :12, 23-28

12 *Kansi Mfumu Nzambi tubaka na Moize ti Aroni nde : « Beno ...me pesa Mono lukumu ve na meso ya bantu ya Israele. Yo yina, Mono mpi ke pesa beno ve nswa ya kunata bantu yai na ntoto ya Mono silaka kupesa bo. »*

23-24...*Mfumu Nzambi tubaka na Moize ti Aroni nde : « Kubika fioti Aroni ta fwa. Yandi ta kota ve na ntoto ya Mono silaka kupesa na bantu ya Israele, sambu beno lemukilaka Mono ve, beno zole...*

25-28 *Nata Aroni ti mwana na yandi Elazare.... Katula bilele ya kinganga-Nzambi na Aroni. Lwatisa yo na Elazare. Aroni ta fwa na kisika yina... Ebuna Aroni kufwaka . . .*

? Yula bana :

Bana sala bageste :

Bana yimba ti kina :

>|< Kumanisa Leso :

Moize vandaka muntu ya Nzambi. Kansi mbala yai, yandi pesaka makasi nzila kuyala yandi. Yo bendaka yandi kusala mbi. Yandi tubaka na ditadi ve na mpila Nzambi me songa yandi, kansi yandi bulaka yo—kaka mbala mosi ve, kansi mbala zole. Yandi mpi pesaka Nzambi lukumu ve. Yandi tubaka bonso yandi mosi vandaka kupesa bantu masa. Yo yina, Nzambi pesaka Moize ti Aroni ndola.

Na nima kubasisa bantu ya Israele na Ezippe, na nima ya kutwadisa bo bamvula 40 na nseke ya zelo na zelo, na nima ya kukanga ntima na kutonga mingi ya bantu, na nsuka yandi pesaka nzila nde makasi kuyala yandi. Makasi yina bendaka yandi kusala mbi. Yo yina, Nzambi tubaka nde yandi lenda kota ve ntoto ya Nzambi ta pesa bo. Mawa !

Verse ya kulonguka :

Awa ntangu ya mbote sambu na bana kulonguka verse ya bo ke longuka bubu. Bana tuba yo mbala tatu ti bageste. Na nima, bo meka kutula ton ti ritima sambu bo yimba ti kina yo mbala tatu diaka.

❖ Devoir sambu na bakristo :

Bana bakristo, devoir mono ke pesa beno mposo yai
kele kukeba na mambu ya makasi. Kana nge ke wa
makasi nswalu, lomba Nzambi kusadisa nge.

✚ Kubinga bana ya zaba Yesu ntete ve :

Kana nge zaba ntete ve nde nge me kuma mukristo,
nki ke kanga nge nzila kukuna madeso na nge na
bilanga ya Yesu? Yandi zola nge mingi. Yandi
fwaka sambu na kufuta mfuka ya masumu na nge
na ntwala ya Nzambi. Yandi telemaka na lufwa.
Yandi ke na moyo bubu, ke kinga nge kukwisa na
Yandi, kubalula ntima na nge, kuyamba Yandi
bonso Mvulusi na nge. Keti nge ta yamba Yandi
bubu? Kana nge zola lusadisu na mambu yina,
bikala na nima ya ecodim, ti beto ta sadisa nge.

Kana ntangu lunga :

Moniteur, kana ntangu lunga, bana lenda tuba verse
ya kulonguka diaka, ti nge lenda longa mikanda ya
Bible. Tala bangindu na nsuka ya mukanda yai.

====NSUKA YA LESO 9



Leso 9

Nzambi
songaka
Moize
kutuba
na ditadi,
yo pesa
bo masa.
Kansi na
makasi,
yandi
bulaka yo
mbala
zole.

*Kana beno me wa makasi,
beno keba.
Mbaimbai yo ta benda
beno kusala masumu.*

Efezo 4 :26a

Leso 10. Banioka tatitaka bantu. Bo zolaka kufwa, kansi Nzambi songaka Moize mpila bo lenda guluka.

I. Preparasio ya Moniteur—

Kutanga 21

◎ Kikuma ya lesos :

Bana ta sosa kuguluka kaka na Yesu Kristo, sambu Yandi ndimaka kukwenda na kulunsi sambu na kugulusa beto.

♥ Verse ya kulonguka :

14 Mutindu Moize nangulaka nioka mosi ya kibende/ na zulu ya dikunzi/ na ntoto ya zelo na zelo,/ kiteso mosi, Mwana-Muntu, bo ta nangula Yandi,/

15 sambu konso muntu yina ndima Yandi/ na ntima na yandi,/ yandi kuivila ve, kansi yandi kuvanda na moyo /ya mvu ya mvu./ Yoane 3 :14-15

☛ Bankunga ya kwenda nzila mosi ti lesos yai :

Kana Nge Zaba Nge Me Vuluswa

Keti Nge Me Butuka Diaka

Kwisa na Yesu Kristo

(To konso mukanda ya ke songa nzila ya kuguluka na Yesu Kristo)

II. Kusala Revisio—

- ▶ Na lesos yai mposo me luta, beto monaka nde nani waka makasi ? (Moize)
- ▶ Nki bendaka makasi na yandi ? (Kubokuta ya bantu)
- ▶ Yo bendaka yandi kusala nki mambu ya mbi ? (Yandi lemfukaka ve na mpila Nzambi songaka yandi kupesa bantu masa. Yandi mpi pesaka Nzambi lukumu ve, kansi yandi tubaka bonso yandi mosi vandaka kusala yo.)
- ▶ Nzambi pesaka yandi nki ndola ? (Nzambi kangaka yandi nzila kukota na ntoto ya Nzambi silaka kupesa bo.)

III. Kulonga Bana Leso Yai—

➔ Kuyantika Leso :

Bantu na bwala mosi monaka nde mupepe mosi ya ngolo ti ya mpasi vandaka kukwisa. Bo waka boma mingi.

Bantu ya nkaka bakaka ntinu kusosa biteki na bo, bayankaka kusosa bankisi na bo mutindu na mutindu, bayankaka kusosa bafoto ya basantu. Bantu ya nkaka kwendaka na mazamu, kubondila bambuta ya me fwaka kusadisa bo.

Tali vandaka mukristo. Yandi mpi vandaka na boma. Nki yandi fweti sala ? Yandi fweti sosa lusadisu ya nani sambu na kugulusa yandi na mupepe yina ?

Na lesos yai beto bubuyai, beto ta mona nde bantu ya Israele mpi vandaka na ntangu ya boma.

☚ Developpement—Malongi ya Leso Yai na Banti 4:

10.1 Bantu bokutilaka Moize diaka. Yo yina, Nzambi pesaka bo ndola diaka. Banioka ya makasi tatitaka bo ti fwaka bantu mingi.

☛ Tangila bana : Kutanga 21 :4-6

4-5 ... na nzila bantu...yantikaka kubokutila Nzambi ti Moize nde : « Sambu na nki beno basisaka beto na nsi ya Ezipre ? Sambu na kufwa beto awa na ntoto ya zelo na zelo ? Awa mampa kele ve, masa mpi kele ve ! Madia yai 'mana', beto me wa yo kiseku !”

6 Ebuna Mfumu Nzambi tindilaka bo banioka ya makasi mingi, ti yo tatikaka bantu mingi na mpila nde bo fwaka.

☛ Yula bana :

☛ Bana sala bageste :

☛ Bana yimba ti kina :

10.2 Bantu ndimaka masumu na bo. Bo lombaka Moize kusambila bo Nzambi, ebuna Moize salaka yo.

☛ Tangila bana : Kutanga 21 :7

7 Yo yina, bantu kwisaka kutuba na Moize
nde : « Beto me sala masumu na kubokutila
Mfumu Nzambi ti nge. Pardo, bondila Mfumu
Nzambi Yandi katudila beto banioka yai ! »
Ebuna Moize sambaka Nzambi.

? Yula bana :

† Bana sala bageste :

‡ Bana yimba ti kina :

10.3 Nzambi songaka Moize kusala nioka ya
bibende ti kangisa yo na nti, nangula yo. Bo
fweti tala yo, mpidina bo kufwa ve.

 Tangila bana :

8 Mfumu Nzambi tubaka na yandi nde : « Sala
nioka mosi ya bibende. Kangisa yo na nti na
mpila nde, konso muntu yina ya nioka ta tatika,
kana yandi tala nioka yai ya bibende, yandi ta
fwa ve. »

? Yula bana :

† Bana sala bageste :

‡ Bana yimba ti kina :

10.4 Moize salaka mpila Nzambi me tuba, ebuna
konso muntu ya talaka nioka yina, moyo na
yandi gulukaka.

 Tangila bana :

9 Moize salaka nioka ya bibende, yandi
kangisaka yo na nti. Ebuna konso ntangu ya
nioka vandaka kutatika muntu, kana yandi tala
nioka yai ya bibende, yandi fwaka ve.

? Yula bana :

† Bana sala bageste :

‡ Bana yimba ti kina :

>|< Kumanisa Leso : Nzambi salaka mambu yai
kusonga na ntawala mutindu bo ta tula Mwana na
Yandi Yesu Mesia na zulu ya kulunsi. Bantu ya

kwikilaka ndinga ya Nzambi na ntangu ya Moize,
bo talaka nioka ya bibende na zulu ya nti. Mpidina,
bo gulukaka na kutatika ya nioka. Kiteso mosi,
bubuyai bantu ya ke zola kufwa sambu na masumu,
bo tala Yesu. Konso muntu yina tula ntima na
Yandi ta guluka.

♥ Bana tuba verse ya kulonguka :

[Moniteur, bana landa kutuba verse na nima ya nge, fraze na
fraze. Bo sala yo mbala zole. Na nima, nge yantika kutuba,
nge kanga na katì, ti bo tuba ndinga ya ke landa. Sala yo mpi
mbala zole.]

 Devoir sambu na bakristo :

Beno bakristo, beno me tala dezia Yesu na zulu ya
kulunsi. Beno me tula ntima na Yandi. Keti beno
mpi me songa bantu ya nkaka nki Yandi me sala
sambu na beno ? Devoir ya mono ke pesa beno
kele kusonga bantu 2 mposo yai nki mutindu nge
ndimaka Yesu Kristo.

† Kubinga bana ya zaba Yesu ntete ve :

Kansi mbala ya nkaka, kana nge yindula kusonga
muntu ya nkaka nki mutindu nge me ndima Yesu,
nge ta kudiyula, « Kansi, mono ta tuba nki ? »
Mbala ya nkaka nge ke na kima ve kusonga bo,
sambu kieleka, nge me ndima Yesu ntete ve, nge
mosi.

Bible tuba nde beto lenda ZABA nde beto me
guluka (1 Yoane 5 :13). Keti nge zaba ? Kana keti-
keti ikele, nge lenda zaba bubuyai. Kana Mpeve ya
Nzambi ke bula na ntima na nge, kwisa na nima ya
ecodim ti beto ta sadisa nge kuzaba kieleka nde
Yesu kele Mvulusi na nge.

Kana ntangu lunga :

Moniteur, kana ntangu lunga, bana lenda tuba verse
ya kulonguka diaka, ti nge lenda longa mikanda ya
Bible. Tala bangindu na nsuka ya mukanda yai.

==NSUKA YA LESO 10

Konso muntu ya talaka
nioka ya kidende,
yandi fwaka ve.



Leso 10

**14 Mutindu
Moize
nangulaka
nioka mosi
ya kibende
na zulu ya**

**dikunzi na ntoto ya zelo na zelo,
kiteso mosi,**

**Mwana-Muntu, bo ta nangula
Yandi,**

**15 sambu konso muntu yina ndima
Yandi na ntima na yandi,**

**yandi kuvanda na moyo ya mvu ya
mvu.**

Yoane 3 :14-15

Leso 11. Balami monaka mpila ve kusinga Israele.

I. Preparasio ya Moniteur sambu na Leso Yai

Kutanga 22—24 (Somere)

◎ Kikuma ya lesosambu :

Bana ta wa boma diaka ve sambu na kuloka to kusila ya bantu, sambu bo ta bakisa nde lusilu lenda simba ve bantu ya Nzambi me sakumuna.

♥ Verse ya kulonguka :

Yo yina Nzambi ke sakumunaka/ bantu yonso ke tulaka Yandi ntima,/ nzila mosi ti lusakumunu/ ya Nzambi sakumunaka Abrami/ sambu na lukwikelu na Yandi./ Galatia 3:9

✿ Bankunga ya kwenda nzila mosi ti lesosambu :

Kikesa Kele
Na Kati ya Abrami
Na Kati ya Yesu

II. Kusala Revisio

- ▶ Na mposo me luta, beto monaka nde banioka ya makasi tatikaka bantu, ti mingi fwaka. Ntangu Moize lombaka nkenda ya Nzambi, nki Nzambi songaka Yandi kusala sambu bantu kufwa ve ? (Yandi sala nioka ya bibende ti kangisa yo na zulu ya nti. Kana muntu tala yo, yandi kufwa ve.)
- ▶ Nki mutindu yai songaka Yesu ? (Bo tulaka Yesu mpi na zulu ya kulunsi, bo nangulaka mpi Yandi. Konso muntu ya tula ntima na Yandi, yandi ta guluka na maladi ya masumu.)

III. Kulonga bana lesosambu :

➔ Kuyantika Leso :

Mwana Tantine zolaka ve mpila ya papa mosi talaka yandi. Yandi monaka kaka nde papa yina vandaka kuloka yandi. Tantine vandaka na boma mingi. ‘A—kana papa yina ke loka mono—’.

Yandi yindulaka nki yandi fweti sala. Ata yandi vandaka mukristo, yandi yindulaka kusosa nkisi to fetishi mosi kukeba yandi. Kansi yandi zabaka nde yina ta pesa Yesu lukumu ve. Nki yandi fweti sala ? Keti bantu ya nkaka lenda sila to loka bantu ya Nzambi ?

Na lesosambu na beto bubuyai, beto ta mona nki salamaka ntangu muntu mosi mekaka kusala yo.

❖ Developpement—Malongi ya Leso Yai na Banti 4 (NB :Sambu na nda ya lesosambu, bitini ya nkaka ta vanda somere) :

11.1 Boma ya bantu ya Israele simbaka Balaki, Mfumu ya Moabi. Yo yina, yandi bingaka Balami sambu na kusinga bo. Kansi Nzambi songaka yandi kusinga bantu ya Israele ve, sambu Yandi me sakumunaka bo.

BOOK Tangila bana : Kutanga 22 :1-14

1-3 Bantu ya Israele telamaka ...na nseke ya Moabi... Balaki...mfumu ya nsi ya Moabi...yantikaka kutekita sambu...bantu ya Israele me kuma mingi.

4c-5 ...Mfumu Balaki tindaka bantu na Balami... Bo...nde : « Ke na bantu awa...bo me fuluka ntoto ya mvimba...

6 Pardo, kwisa sadisa mono. Singa bo, sambu bo me luta bantu na mono na ngolo...

12 Mfumu Nzambi nde : « Kwenda ve ti bambuta yai. Nge mpi ta singa bantu ya Israele ve, sambu Mono me sakumuna bo. »

13-14 ...Balami tubaka na bambuta ya Balaka tindaka nde : “...Mfumu Nzambi me buya mono kukwenda ti beno. »...

? Yula bana :

↑ Bana sala bageste :

✿ Bana yimba ti kina :

11.2 Balaki lombaka Balami mbala ya zole kusinga Israele. Yandi ndimaka kukwenda na bo, kansi kutuba kaka mpila Nzambi ta songa yandi. Nzambi tindaka wanzio na nzila sambu na kukebisa yandi kutuba kaka mutindu yina.

Tangila bana : Kutanga 22 :15-20

15-17 *Ntangu yai, Balaki tindaka diaka bambuta...mingi...Bo kwendaka kutuba na Balami nde :*
« ...Pardo, buya ve na kwisa kusadisa mono ! Mono ta pesa nge lukumu mingi...bima yonso ya nge ta lomba. Kansi pardo, singa bantu yai ! »

18 *Kansi Balami...nde :* « Ata Balaki zolaka kupesa mona arza ti wolo yonso yina me fuluka na nzo na yandi, mono lenda buya ata fioti ve kulanda mambu ya Mfumu Nzambi...tubaka.

20 *Na mpimpa, Nzambi kwisaka kutuba na Balami nde :* « ...Kwenda ti bo. Kansi sala kaka mambu ya Mono ta songa nge. »

Ata Nzambi ndimaka nde Balami kwenda ti bo, Yandi vandaka na kiese ve, sambu Balami waka ve ndinga na Yandi na mbala ya ntete. Yo yina, Nzambi tindaka wanzio kukangisa yandi nzila. Yo kebisaka yandi nde yandi tuba kaka mambu ya Nzambi ta songa yandi.

?

Yula bana :

† **Bana sala bageste :**

¶ **Bana yimba ti kina :**

11.3 Balaki pesaka makabu mingi, kansi mbala tatu, Nzambi kangaka Balami nzila kusinga bantu ya Israele.

Tangila bana : Kutanga 22 :41--24 :1-2

41 ...na suka Balaki kwendaka na Balami....na ndambu ya bangumba, sambu na kumona camp ya bantu ya Israele. »

(Somere ya 23 :1-6 :)

Bo salaka bamesa-kimenga ti pesaka bamakabu ya bambisi mingi. Yo ke monika nde bo banzaka yina ta benda Nzambi kubalula mabanza na Yandi. Na nima, bo kumaka na nsongi ya ngumba, sika camp ya Israele monikaka.

7 *Balami tubaka nde :*

« ...Balaki ...songaka mono nde : 'Kwisa,

singa bantu ya Israele ...

8 *Kansi nki mpila mono lenda singa bantu ya Nzambi Yandi mosi me singa ve ?»*

13 *Balaki tubaka diaka na Balami nde :*
« Kwisa, beto kwenda na kisika ya nkaka...Kuna nge ta singila mono bo. »

14-16 (Somere) Balaki pesaka bamakabu mingi ya bambisi diaka. Yandi yindulaka nde bamakabu mingi diaka lenda balula mabanza ya Nzambi sambu Yandi ndima Balami kusinga bantu ya Israele.

17 *Balami kwisaka kuvutuka. ...Balaki yulaka yandi nde :* « Mfumu Nzambi me tuba nki ? »

18-19 *Balami tubaka ...nde :* « ...Nzambi kele ve nkwa-luvunu. Keti Yandi lenda sila mambu, kansi Yandi lungisa yo ve ?

20 ...*Nzambi me sakumunaka bo.*
Mono, mpila kukatula yo kele ve.

25 *Balaki tubaka na Balami nde :* « Kana nge zola ve kusinga bo, kusakumuna bo mpi ve ! »...

27 *Balaka tubaka diaka na Balami nde :*
« Kwisa diaka, mono nata nge na kisika ya nkaka. Mbala ya nkaka kuna Nzambi ta ndima nge kusingila mono bantu yai. »

28 *Ebuna Balaki nataka yandi na...kisika ya bo lenda mona (ntama).*

24 :1 *Kansi ntangu yai, Balami zabaka nde Mfumu Nzambi me zola kaka kusakumuna bantu ya Israele...*

2 *Yandi tedimisaka meso na yandi. Yandi monaka camp ya Israele, konso dikanda na bantente na bo. Mpeve ya Nzambi simbaka yandi, (ebuna yandi sakumunaka Israele diaka.)*

?

Yula bana :

† **Bana sala bageste :**

¶ **Bana yimba ti kina :**

11.4 **Balami songaka bo nde Nzambi ta tinda Mesia sambu na bansi yonso na kati ya Israele.**

Yo yina, Nzambi me sakumuna bo.

 **Tangila bana :** Kutanga 24 :10—25,
somere

Na nsuka, Nzambi kangulaka meso ya Balami
sambu yandi kumona nki ta salama na bilumbu
na ntwala. Yandi tubaka nde Mfumu ya nene
Mesia ta telama na kati ya Israele.

Yai kele na kati ya baraison ya Balami lendaka
ve kusinga Israele. Na lukanu ya Nzambi,
Mesia-Mvulusi fweti kubasika na kati ya
dikanda yina. Yo yina, Nzambi zolaka
kusakumuna bo.

>|< Kumanisa Leso :

Bantu mingi zinga na boma nde muntu me loka bo,
to muntu zola kuloka bo. Kansi beto kele bakristo.
Beto ke zinga na boma ve. Nzambi me sakumuna
beto na kati ya Mwana na Yandi, Mesia Yesu
Kristo. Yo yina, muntu lenda singa beto ve.
Kuloka to konso lusilu ke simbaka ve bantu ya
Nzambi.

Devoir sambu na bakristo :

Kana nge zaba Yesu Kristo bonso Mvulusi na nge,

devoir mono ke pesa nge mposo ke kwisa, yo yai :
Tuba konso lumbu, “Nzambi me sakumuna mono
na kati ya Yesu Kristo. Muntu lenda sila mono ve.
Muntu lenda loka mono ve.” Bambuka yo. Tuba
yo diaka konso ntangu muntu zola kusila nge.

Kubinga bana ya zaba Yesu ntete ve :

Kansi kestio ya nene-nene kele kana nge kele
kieleka na kati ya Yesu. Lusakumunu yonso kele
na kati na Yandi.

Kana keti-keti kele na ntima sambu na mambu yai,
kwisa na nima ya ecodim. Solula ti beto. Beto kele
awa sambu na kusadisa nge ! [Moniteur, kana
mwana bikala na nima ya ecodim, yula yandi nki
yandi zola kusolula. Kana yandi me yilama,
twadisa yandi na Yesu Kristo.]

Kana ntangu lunga :

Moniteur, kana ntangu lunga, bana lenda tuba verse
ya kulonguka diaka, ti nge lenda longa mikanda ya
Bible. Tala bangindu na nsuka ya mukanda yai.

====NSUKA YA LESO 11



Leso 11

Foto—Balami
mekaka kusinga
Israele, kansi
yandi monaka
mpila ve, sambu
dezia Nzambi
me sakumuna
bo.

Kuloka muntu,
yo lenda simba
ve bantu ya
Nzambi me
sakumuna.

*Yo yina, Nzambi ke sakumunaka
bantu yonso ke tulaka Yandi ntima,
nzila mosi ti lusakumunu ya
Nzambi sakumunaka Abrahami,
sambu na lukwikelu na yandi.*

Galatia 3:9

Leso 12. Bantu ya Israele yantikaka kuyilama kukota nsi ya Nzambi me sila bo.

Kutanga 25 & 26, somere

I. Preparasio ya Moniteur—

◎ Kikuma ya lesos :

Bana ta sosa bampila kuyilama sambu na kisalu ya nene ya Nzambi zola bo kusala, muntu na muntu.

♥ Verse ya kulonguka :

6 Nge muntu ya bumolo,/ yindula mpila bafourmi ke sala, ti baka mayele./

7-8 Bo ke na mbuta ve, mfumu ve, /ntwadisi ve,/ kansi bo ke bumbaka madia na yandi na mvula,/ ebuna na musibu bo ke monaka mpasi ve./
Bingana 6 :6-8

☛ Bankunga ya kwenda nzila mosi ti lesos :

Bafourmi Kele Ngangu
Keti Nge Me Butuka Diaka ?

II. Kusala Revisio—

- Na mposo me luta, beto monaka muntu ya mekaka kuloka bantu ya Nzambi, Israele. Nki salamaka? (Nzambi kangaka yandi nzila, sambu Yandi mosi me sakumuna bo.)

III. Kulonga Bana Leso Yai—

➔ Kuyantika Leso :

Ntangu yai, bantu ya Israele me tambula na kati ya nseke bamvula mingi. Nani bambuka sambu na nki bo fweti tambula mutindu yina ?

(Nzambi pesaka bo ndola sambu bo vandaka na boma kukota nsi ya Yandi silaka kupesa bo. Bo kwikilaka ve nsilulu ya Nzambi nde Yandi ta pesa yo na bo. Yo yina, Nzambi tubaka nde bo fweti tambula na nseke tii ntangu ya bantu yina me fwaka.

Ntangu yai, bo me tambula bamvula mingi. Ntangu kukota nsi ya Nzambi silaka bo me kuma penepene. Ntangu me lunga nde bo yilama kukota. Nki bo

fweti sala na ntwala bo kota ? Nzambi songaka bo mambu zole.

❖ Developpement—Malongi ya Leso Yai na Banti 4 : (Leso yai basomere mingi)

12.1 Bo fweti katula bantu ya me twadisa bo kusamba biteki ti kusala bizumba na bankento ya nzenza.

 **Tangila bana :** Kutanga 25, somere
Na camp mosi ya bantu ya Israele, bo vandaka penepene na sika ya bantu ya Moabi sambaka biteki. Bo salaka bafete ya nene ya biteki, ti bankento ya Moabi bingaka babakala ya Israele. Bafete yina vandaka fuluka na bizumba ti mambu yonso ya mbi. Babakala ya Israele kangamaka na kati na yo. Mawa !

Nzambi zengaka nde bantu yonso ya twadisaka bo na mbi yina, bo baka ndola ya lufwa. Bantu mingi kufwaka na mambu yina.

? Yula bana :

↑ Bana sala bageste :

☛ Bana yimba ti kina :

12.2 Bo fweti tanga diaka bafami ya Israele sambu na kuzikisa nde bandonga ya bantu ya kwikilaka ve, yonso me fwa.

 **Tangila bana :** Kutanga 26, somere
Na luyantiku ya mukanda ya Kutanga, Nzambi songaka bo kutanga nombre ya bafami na bo. Ntangu yai, Nzambi songaka bo kusala yo diaka, sambu bo zaba mbote bafami ikwa ta kota na nsi ya Nzambi silaka kupesa bo.

Bantu mingi me fwa kaka sambu bamvula na bo me lunga, kansi bambuka nde mingi ya nkaka, Nzambi pesaka bo ndola ya lufwa sambu na kubokuta ya mbi na bo.

Kana beto tala nombre ya bantu ya yantikaka voyage ti bo ya manisaka, beto ta mona nde makanda ya nkaka yelaka, kansi ya nkaka yelaka ve.

? Yula bana :

¶ Bana sala bageste :

¶ Bana yimba ti kina :

12.3 Nzambi songaka bo mutindu kukabisa ntoto ntangu bo kota nsi ya Nzambi ta pesa bo.

Tangila bana : Kutanga 26 :52-53

52-53 *Mfumu Nzambi tubaka na Moize nde : « Nge fweti kabisa ntoto na makanda ya bantu ya Israele mutindu kele mingi na bo.*

54-56 ...Na kukabisa ntoto beno fweti bula zeke...»

62 *Ntalu yonso ya babakala ya dikanda ya Levi ...vandaka 23,000. Bo...bakaka ntoto ve bonso bampangi na bo* [sambu bo vandaka banganga-Nzambi. Bo zingaka na kati ya bamakabu ya bantu pesaka.]

? Yula bana :

¶ Bana sala bageste :

¶ Bana yimba ti kina :

12.4 Bo zikisaka nde bantu yonso ya buyaka

kukota nsi ya Kanana ntete, bo me fwa.

Mpidina bo me yilama kukota nsi Nzambi silaka bo.

Tangila bana : Kutanga 26 :65-66

65-66 *Bantu yonso ya Moize ti Aroni tangaka mbala ya ntete ...bo yonso me fwa. Ata muntu mosi bikalaka ve... Kubikilaka kaka Kalebi...ti Yozue...*

? Yula bana :

¶ Bana sala bageste :

¶ Bana yimba ti kina :

>|< Kumanisa Leso :

Ntangu me lunga nde bantu ya Israele yilama kukota nsi ya Nzambi silaka bo. Nzambi songaka bo kusala mambu yai sambu bo yilama kukota mbote. Na ntwala kusala konso mambu ya mfunu, ntete kele kuyilama. Kana beno me yilama mbote, yo ta sadisa beto kusala kisalu ya mbote.

♥ Verse ya Kulonguka :

[Moniteur, bana tuba verse fraze na fraze na nima ya nge mbala zole.] Na nima, bo yindula bageste ya lenda songa bangindu yina, bo sala yo pratike ti bageste.]

¶ Bana yimba : Bafourmi Kele Ngangu

⌚ Devoir sambu na bakristo :

Beno bakristo, devoir mono ke pesa beno, yo yai : Yindula sesepiyai mambu mosi ya mbote ya nge zola kusala kana nge me yela. Na mposo yai, sala yonso ya nge lenda sambu na kuyilama kusala yo.

✚ Kubinga bana ya zaba Yesu ntete ve :

Kansi mbala ya nkaka nge zaba mbote-mbote ve kana nge kele mukristo, to nge kele mukristo ntete ve. Mbote nge yilama sambu na kuyamba Yandi. Kana Mpeve ya Nzambi ke bula na ntima na nge, bikala na nima ya ecodim bubuyai, ti beto ta kwisa kusonga nge nki mutindu nge lenda yamba Yesu ya kieleka.

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.


==NSUKA YA LESO 12

(Tala visuel na page ya ke landa

Carte ya nombre ya konso dikanda, kusadila na Leso 12

Bafami na konso dikanda ya Israele

Rubeni	46,500 → 43,370
Simeoni	59,300 → 22,200
Gadi	45,650 → 40,500
Yuda	74,600 → 76,500
Isakare	54,400 → 64,300
Zebuloni	57,400 → 60,500
Efrayimi	40,500 → 32,500
Manase	32,200 → 52,700
Benyamini	35,400 → 45,600
Dani	62,700 → 64,400
Asere	41,500 → 53,400
Neftali	53,400 → 45,400
YONSO	603,500 → 601,370



Leso 12

**6 Nge muntu ya bumolo,
yindula mpila bafourmi ke
sala, ti baka mayele.**

**7 Bo ke na mbuta ve,
mfumu ve,
ntwadisi ve,**



**8 kansi bo ke
bumbaka madia na bo na
mvula, ebuna na musibu
bo ke monaka mpasi ve.**

Bingana 6 :6-8

Leso 13. Moize ndimaka ndola ya Nzambi pesaka yandi ti salaka kisalu na yandi ya nsuka.

I. Preparasio ya Moniteur—

Kutanga 27 :12-23, 28 :1-2

◎ Kikuma ya lesos :

Bana ta ndima lukanu ya Nzambi ti bilumbu ya luzingu ya Yandi me zenga sambu na beto.

♥ Verse ya kulonguka :

*15-16 Moize sambaka Nzambi nde :/« Mfumu Nzambi,/ Nge ke pesaka moyo na bantu yonso.../ »
Kutanga 27 :15-16a*

♣ Bankunga ya kwenda nzila mosi ti lesos :

Bandeke Kele Yimba
Bu Yesu Kele na Mono

II. Kusala Revisio—

- ▶ Nani lenda songa beto mpila mosi ya bantu ya Israele vandaka kuyilama kukota nsi ya Nzambi silaka bo ?
(Bana lenda tuba mosi na kati ya mambu yai :
--Bo katulaka bantu ya me twadisa bo kusamba biteki
--bo tangaka diaka bafami ya Israele
--bo kabisaka ntoto na kati ya bafami
--bo zikisaka nde bantu yonso me fwaka, bayina buyaka kukota nsi.)

III. Kulonga Bana Leso Yai—

➔ Kuyantika Leso :

Mwana zina ya ntima vandaka na makasi na Nzambi. Leki na yandi ya nkento Susa me baka maladi mosi ya ngolo. Susa zabaka Yesu. Yo yina, yandi vandaka na ngemba kaka. Yandi nwanaka na maladi ngolo, ti bantu tulaka yandi na lombilu. Penepene na nsuka, Susa tubaka nde, « Yesu me songa mono nde Yandi ke na mfunu na mono kuvanda ti Yandi. » Ebuna yandi kangaka meso, ti na ntangu fioti, yandi fwaka.

Ntima bakisaka ve. Sambu na nki Nzambi belulaka leki na yandi ve ? Yandi songaka Nzambi nde, “Mono zola kuwa zina na Nge diaka ve ! »

Bana, nki beno banza ? Keti Ntima salaka mbote kuvanda na makasi na Nzambi ? Na mukanda ya Kutanga na Bible, beto mona nde, penepene na nsuka ya moyo ya Moize, mambu ya mpasi bwilaka yandi, mpi. Keti yandi waka makasi na Nzambi ? Beto ta mona na lesos bubuyai.

Bambuka nde, ntangu mosi ya bantu ya Israele vandaka na nzala, Nzambi songaka Moize kutuba na ditadi, yo basisa masa. Kansi na makasi, Moize bulaka yo mbala zole. Yandi mpi pesaka Nzambi lukumu ve. Yandi tubaka bonso yandi mosi fweti basisa masa na ditadi yina. Yo yina, Nzambi pesaka yandi ndola. Nani bambuka ndola yina ? (Yandi ta kota ve nsi ya Nzambi me silaka bo.)

🕸 Developpement—Malongi ya Leso Yai na Banti 4 :

13.1 Nzambi songaka Moize nde yandi tombuka ngumba sambu na kumona nsi ntama, yandi yilama na kufwa. Moize mpi ndimaka lukanu ya Nzambi.

📖 Tangila bana : Kutanga 27 :12-16

*12 Mfumu Nzambi tubaka na Moize nde :
« Tombuka na bangumba...kuna nge ta mona ntoto ya Mono ke pesaka bantu ya Israele.*

13-14 Nge ta tala ntoto yango, na nima nge ta fwa mutindu kufwaka mbuta na nge Aroni, sambu beno yonso zole, beno lemrukilaka Mono ve. Ntangu bantu yonso ya Israele swanisaka Mono...beno pesaka Mono lukumu ve na meso na bo. »

15-16 Moize sambaka Nzambi nde : « Mfumu Nzambi, Nge ...ke pesaka moyo na bantu yonso...»

❓ Yula bana :

⬆ Bana sala bageste :

♣ Bana yimba ti kina :

13.2 Moize lombaka Nzambi kusola ntawadisi ya mpa kuyinga yandi. Ebuna Nzambi songaka

Moize kutula Yozue ntwadisi.

Tangila bana : Kutanga 27

16b-17...*Sola muntu ya nkaka kuvanda mfumu ya bantu yai, yina ta kuka kunata bo...*»

18 *Mfumu Nzambi tubaka na Moize nde : « Yozue... kele muntu ya Mono me pesa mayele. Yandi ta kuka. Binga yandi. Tula yandi maboko.*

19 *Yandi telama na ntwala ya Nganga-Nzambi...ti bantu yonso, ebuna na meso na bo yonso, tuba nde yandi muntu ta yinga nge.*

? **Yula bana :**

† **Bana sala bageste :**

* **Bana yimba ti kina :**

13.3 Moize lemfukaka ti tulaka Yozue ntwadisi kuyinga yandi.

Tangila bana : Kutanga 27 : 22-23

22 *Moize salaka mambu yonso ya Mfumu Nzambi songaka yandi. Yandi tulaka Yozue na meso ya nganga-Nzambi...ti ya bantu yonso.*

23 *Yandi tulaka yandi maboko, kaka mutindu Mfumu Nzambi tubaka. Ebuna Yozue kumaka kuyinga Moize...*

? **Yula bana :**

† **Bana sala bageste :**

* **Bana yimba ti kina :**

13.4 Na nima, Nzambi songaka Moize bandinga ya nsuka kusonga bantu ya Israele.

Tangila bana : Kutanga 28 :1-2

28 :1-2 *Mfumu Nzambi songaka Moize kutuba na bantu ya Israele nde : « Beno sala atasio...»*

(Moniteur, NB. **Tangila bana note yai :** Awa tii nsuka ya mukanda ya Kutanga ti mukanda ya Kulonga yonso kele malongi ya nsuka ya Nzambi songaka Moize kupesa bantu ya Israele. Na nima yandi pesaka yo, Moize kufwaka.)

? **Yula bana :**

† **Bana sala bageste :**

* **Bana yimba ti kina :**

>|< **Kumanisa Leso :**

Bana, Moize bakisaka nde yandi me sala mbi ntangu yandi bulaka ditadi mbala zole na makasi ti kondaka kupesa Nzambi lukumu. Yandi ndimaka ndola ya Nzambi pesaka yandi. Yandi zabaka nde Nzambi ke pesaka moyo. Yo yina, Yandi mpi ke na kiyeka kubaka yo diaka.

Luzingu na beto ta vanda kuluta kiese kana bonso Moize, beto kunwana ve ti Nzambi, kansi beto ndima mpila ya Yandi me zenga sambu na beto. Ebuna beto ta vanda na ngemba, ata na luse ya lufwa.

Devoir sambu na bakristo :

Beno bakristo, devoir mono ke pesa beno, yo yai : Na mposo yai, yindula mbote. Keti nge kele kunwana ti Nzambi ? Kana mpidina, bika mambu yina na maboko na Yandi. Songa Yandi nde nge ndima nde Yandi zaba nki me luta mbote. Nge bikala kaka na ngemba.

† **Kubinga bana ya zaba Yesu ntete ve :**

Kansi beno ya me yamba Yesu Kristo ntete ve na ntima na beno, zaba nde, ngemba kele kaka na Yesu. Kana nge zaba ve nde nge me yamba Yandi, mbote kubinga Yandi bubuyai, Yandi kota ntima ti luzingu na nge, Yandi kuma Mvulusi na nge.

Verse ya Kulonguka :

[Moniteur, bana tuba verse mbala tatu. Na nima, mwana mosi tuba ndinga ya ntete. Mwana ya zole tuba ndinga ya zole, mwana ya tatu, etc. tii na nsuka na yo. Sala yo mbala zole diaka. Na nima, bana tesa kutuba yo mosi-mosi.]

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

==NSUKA YA LESO 13

Leso 13

Moize tulaka Yozue ntwadisi kuyinga yandi, mpi
kutwadisa bantu ya Israele kukota nsi Nzambi me
silaka bo.



16

*15 Moize
sambaka
Nzambi
nde:*

**« Mfumu Nzambi, Nge
ke pesaka moyo na
bantu yonso...»**

Kutanga 27:15-16a

Leso 14. Ndambu ya makanda bakaka ntoto na bo, kansi bo fweti ntete sadisa bampangi kubaka ntoto yonso.

I. Preparasio ya Moniteur—

Kutanga 26 :63, kapu 32

◎ Kikuma ya lesos :

Bana ta sosa mambote ya bampangi yonso, kaka ya bo mosi ve. Bo ta sadisana.

♥ Verse ya kulonguka :

*Konso muntu na kati na beno/fweti sosa mpi
mambote ya bantu ya nkaka,/ kansi mambote na
yandi mosi mpamba ve./ Filipi 2 :4*

♣ Bankunga ya kwenda nzila mosi ti lesos yai :

Beto Bakristo Sadisana
Beto Zolana

II. Kusala Revisio—

- ▶ Na mposo me luta, beto monaka mambu ya mawa sambu na Moize. Nki yo ?
(Yandi fweti yilama sambu na kufwa. Yandi lenda kota ve nsi ya Nzambi me sila bo.)
- ▶ Beto monaka mpi nde Nzambi songaka Moize kutula muntu ya nkaka kuyinga yandi. Muntu yina nani ? (Yozue)

III. Kulonga Bana Leso Yai—

➔ Kuyantika Leso :

Ntangu ya longi kele kuyula kestio, mbala mingi beto kuwa : ‘ Mono ! Mono ! Mono ! Mono !

Yo lenda vanda mbote kutuba ‘Mono !’ kana yina ke songa nde nge zaba mvutu na kestio. Kansi bantu mingi tuba konso lumbu na ntima na bo, ‘Mono ! Mono ! Mono ! Mono !’ Bo kele kuyindula kaka mambote na bo mosi. Leso na beto bubuyai ta songa beto nki Nzambi yindula sambu na muntu ya ke yindula kaka : ‘Mono ! Mono ! Mono ! Mono !’

◆ Developpement—Malongi ya Leso Yai na Banti 4 :

14.1 Bana ya Israele vandaka na sika ya bo lenda sabuka Nzadi ya Yordani. Bo lenda kota nsi ya Nzambi silaka bo. Po pana, makanda ya Rubeni ti Gadi zolaka kusimba ntoto na bo.

BOOK Tangila bana : Kutanga 26 :63, 32 :1

Kutanga 26 :63...Na lweka ya nzadi ya Yordani...

32 :1 Bantu ya makanda ya Rubeni ti Gadi vandaka na bambisi mingi-mingi... Bo monaka nde ntoto....me fwana na kusansa bambisi...

? Yula bana :

↑ Bana sala bageste :

♣ Bana yimba ti kina :

14.2 Bo lombaka Moize nde bo bikala kuna, bo sabuka Nzadi ya Yordani ve.

BOOK Tangila bana : Kutanga 32 :2-5

2-4 Bo kwendaka kutuba na Moize... nde : Babwala yai...kele na kati ya ntoto ya beto bantu ya Israele botulaka na ngolo ya Mfumu Nzambi. Ntoto yango me fwana kusansa bambisi. Beto mpi ke na bambisi mingi.

5 Pardo, pesa beto ntoto yai, yo vanda ntoto na beto. Mpidina mfunu kele ve na kunata beto na simu ya nkaka ya Yordani.”

? Yula bana :

↑ Bana sala bageste :

♣ Bana yimba ti kina :

14.3 Moize nganinaka bo nde bo fweti sadisa bampangi na bo ntete kubaka ntoto ya mvimba.

BOOK Tangila bana : Kutanga 32 :6

6 Moize nganinaka bo nde : “Nki beno ke tuba ? Bampangi na beno ke kwenda kunwana bitumba. Ebuna beno...ta bikala awa na kupema ?

♥ Verse ya kulonguka :

[Moniteur, yai kele sika ya mbote kusonga bana verse ya

kulonguka. Bo tanga yo kaka mbala mosi to zole, ebuna landa lesos diaka.]

14.4 Bo lombaka nde bo tunga ntete balupangu ya bambisi ti banzo sambu na bafami na bo. Na nima, bo ta sadisa bampangi kubaka ntoto na bo mpi. Moize ndimaka. Kaka yandi songisaka bo nde bo lungisa yina bo me sila.

Tangila bana : Kutanga 32 :16-24

16 Bantu ya Rubeni ti ya Gadi kwisaka kutuba diaka na Moize nde : « Ntete bika beto tunga balupangu sambu na bambisi na beto ti babwala sambu na bafami na beto.

17-18 Na nima, beto ta baka babunduki nswalu...Beto ta kwisa kuvutuka ve, tii kuna bampangi na beto me zwa ntoto ya bo.

20-21 Moize tubaka na bo nde : « Kana yo kele mpidina, beno yilama... Basoda na beno yonso sabuka na simu ya Yordani, bo nwanisa bambeni na beto na zina ya Mfumu Nzambi tii kuna Yandi kula bo.

24 Beno tunga babwala sambu na bafami na beno ti balupangu sambu na bambisi na beno, kansi beno kuvila ve mambu ya beno me tuba.”

? Yula bana :

† Bana sala bageste :

‡ Bana yimba ti kina :

14.7 Ebuna bo tungaka banzo na bo. Na nima, bo yilamaka kusabuka Yordani kusadisa bampangi na bo.

Tangila bana :

32: 25 Bantu ya Gadi ti ya Rubeni ndimaka nde : «...beto ta sala kaka mutindu nge me tuba.

♥ Verse ya kulonguka :

[Moniteur, ntangu yai bana yika bageste. Bo tuba yo mbala tatu diaka.]

>< Kumanisa Leso :

Bana, beto me mona nde bantu ya makanda ya Gadi ti ya Rubeni vandaka na lukanu ya bo sambu na mambote na bo mosi. Kansi Moize bambukisaka bo nde bo fweti sadisa bampangi ya nkaka mpi. Bo wakanaka na lukanu ya sadisaka bo, ti bampangi ya nkaka mpi. Yo vandaka lukanu ya kusadisana. Yo sukaka na kiese sambu na bo yonso.

¶ Bana yimba : Beto Bakristo Sadisana

⌚ Devoir sambu na bakristo :

Bana bakristo, devoir mono ke pesa beno mposo yai, yo yai : Beno sosa mpila kusadisa mukristo ya nkaka, ebuna nge sala yo.

✚ Kubinga bana ya zaba Yesu ntete ve :

Kansi, kana nge zaba Yesu ntete ve, mono ke yula nge : Kuyindula mbote-mbote. Nki ke kanga nge nzila kukwisa na Yesu ? Nge me sala masumu ya me pesa Nzambi kiese ve. Nge ke na mfunu ya Ngulusi. Yesu zola kugulusa nge. Kana nge ke na mfunu ya lusadisu na mambu yai, kwisa solula ti mono na nima ya ecodim, to na katy ya mposo yai.

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

==NSUKA YA LESO 14

Leso 14



**Konso
muntu na
kati na beno
fweti sosa
mpi
mambote ya
bantu ya nkaka,
kansi mambote na
yandi mosi mpamba ve.**

Filipi 2 :4

Leso 15 Nzambi songaka mpila ya mbote kukabisa ntoto na kati ya makanda ya Israele.

I. Preparasio ya Moniteur—

Kutanga 34, 35 :1—8

◎ Kikuma ya lesos :

Bana ta sala na mpila ya kele juste sambu na bantu yonso, sambu Nzambi kele juste, ti Yandi zola bantu na Yandi kuvanda juste.

♥ Verse ya kulonguka :

*Beno fweti talaka bantu yonso kiteso mosi...
mpidina beno ta zaba kutunga ti kuzinga na ntoto
ya Mfumu Nzambi ke pesa beno. Kulonga 16 :20*

♥ Bankunga ya kwenda nzila mosi ti lesos yai :

Beno Zolana
Nzambi Ke Mbote (Nzambi kele juste)

II. Kusala Revisio—

- ▶ Bantu ya Israele me yilama kukota nsi ya Nzambi silaka na bambuta na bo. Kusala yo, bo fweti sabuka masa ya Yordani.
- ▶ Kansi makanda ya nkaka, Gadi ti Rubeni, bo lombaka Moize kupesa bo nzila kubikala sika bo vandaka, kupesa bo ntoto yina. Yo vandaka mbote sambu na bambisi na bo. Moize ndimaka. Kansi na nima bo me tunga banzo ti balupangu ya bambisi, bo fweti sabuka Yordani ti bampangi na bo. Bo nwana mvita ntete sambu makanda yonso baka bisika na bo. Na nima, bo lenda yutuka na bafami na bo.

III. Kulonga Bana Leso Yai—

➔ Kuyantika Leso :

Mwana zina ya Sasi vandaka na kiese ntangu yandi monaka nde mama me sala gato ya kitoko. Yandi zolaka gato mingi. Ntangu mama zolaka kuzenga gato yina, Sasi bondilaka yandi nde, « Mama, mono zenga yo. » Yandi yindulaka nde yandi ta zenga kitini na yandi nene kuluta bantu ya nkaka.

Mama ndimaka nde Sasi kuzenga yo. Kieleka, Sasi zengaka kitini mosi nene mingi kuluta bitini ya nkaka.

Na nima, mama bakaka kitini ya gato yina ya nene ti pesaka yo na papa. Sasi waka mawa. Ebuna mama tubakilaka yandi nde, « Sasi, nge zaba nde muntu yina zenga gato, yandi fweti vanda muntu ya nsuka kusola kitini na yandi. » Mama vandaka na mayele mingi. Yandi bakisaka mbote mambu ya Sasi yindulaka kusala.

Bana, kana beto ke sosa mambote na beto mosi kaka, yina kele juste ve. Kuvanda juste kele kusosa mambote ya bantu yonso. Bubuyai beto ta landa bantu ya Israele diaka, ti beto ta mona mpila Nzambi songaka bo kuzenga ntoto ya Kanana na mpila ya ta vanda juste, kaka sambu na dikanda mosi ve, kansi sambu na bantu yonso.

🕸 Developpement—Malongi ya Leso Yai na Banti 4 :

15.1 Nzambi songaka bantu ya Israele nene ya ntoto Yandi vandaka kupesa bo.

📖 Tangila bana : Kutanga 34 :1-2

1-2 Mfumu Nzambi songaka Moize kutuba na bantu ya Israele nde : “Beno ke kwenda kukota na nsi ya Kanana, ntoto ya Mono ke pesa beno. Yo ta vandaka ya beno tii kuna. [Ebuna Yandi songaka nene ya ntoto ya Yandi pesaka bo.]

❓ Yula bana :

❗ Bana sala bageste :

✿ Bana yimba ti kina :

15.2 Nzambi songaka bo kubula zeke sambu na kuzenga nki dikanda ke baka nki ntoto.

📖 Tangila bana : Kutanga 34 :13-15

13 Moize ...tubaka diaka nde : « Yai kele ntoto ya Mfumu Nzambi me pesaka... Na kukabisa yo, beno fweti bula zeke.

14-15 Makanda ya Rubeni ti Gadi ti ndambu ya dikanda ya Mansase me baka dezia ntoto na bo

*mutindu kele bafami na bo, awa na ndambu ya
Este ya Yordani . . .*

? **Yula bana :**

† Bana sala bageste :

‡ Bana yimba ti kina :

15.3 Nzambi songaka nani Yandi me sola kukabisa ntoto na kati ya makanda.

 **Tangila bana :** Kutanga 34 :16-18

*16-17 Mfumu Nzambi tubaka na Moize nde :
« Nganga-Nzambi Elazare ti Yozue... bo ta
kabisila bantu ya Israele ntoto.*

*18 Na kusadisa bo na kisalu yai, nge ta pesa bo
...mbuta mosi na konso dikanda. (Yandi
landaka kusonga bo bazina ya bambuta yina.)*

? **Yula bana :**

† Bana sala bageste :

‡ Bana yimba ti kina :

15.4 Nzambi songaka konso dikanda kupesa Balevi babwala ti ntoto sambu na kusansa bambisi na bo, sambu Balevi ta sala bilanga ve, kansi kisalu ya Nzo-Nzambi.

 **Tangila bana :** Kutanga 35 :1-2

*1 Kuna...na lweka ya nzadi ya
Yordani...Mfumu Nzambi tubaka na Moize
nde :*

*2 « Songa bantu ya Israele nde, na ntoto ya bo
ta baka, bo pesa babwala ti ntoto ya nkaka na
bantu ya dikanda ya Levi, sambu bo tunga
muna ti kusansa bambisi na bo.*

? **Yula bana :**

† Bana sala bageste :

‡ Bana yimba ti kina :

>|< Kumanisa Leso :

Bantu ya Israele me kuma penepene na ntangu
Nzambi ta pesa bo ntoto ya Kanana, bonso Yandi
silaka ntama na bankaka na bo. Na nima bo me

Leso 15

baka yo, bo fweti kabisa yo na kati ya makanda
yonso. Nzambi zolaka ve nde bo kunwanina ntoto.
Yandi zolaka nde bo sala yo na ordre ti na mpila ya
ta vanda juste sambu na makanda yonso. Yo yina,
ata na ntwala bo kotaka ntoto yina, Nzambi songaka
bo mpila ya kukabisa yo.

Nzambi kele juste. Yandi ke yindula mambote ya
bantu yonso. Bo fweti sala bisalu yonso na bo na
mpila ya kele juste, kaka sambu na dikanda na bo
mosi ve, kansi sambu na makanda yonso.

 **Verse ya kulonguka**

*[Moniteur, yai kele ntangu ya mbote sambu na bana kutuba
verse ya kulonguka.]*

 **Devoir sambu na bakristo :**

Mbala mingi, beto bantu yindula kaka mambote ya
beto mosi. Devoir mono ke pesa beno bakristo, yo
yai : na mposo ke kwisa, sosa mambote ya bantu ya
nkaka. Sosa kusala na mpila ya kele juste ti mbote
sambu na bantu yonso. Yina ta pesa Nzambi kiese,
ti yo ta pesa luzingu ya ngemba.

 **Kubinga bana ya zaba Yesu ntete ve :**

Kansi ntangu mono tuba, “beno bakristo,” mbala ya
nkaka nge zaba ve kana nge kele na kati to ve.
Mbala ya nkaka nge zaba ve kana nge kele
mukristo. Muntu kele mukristo ve sambu yandi me
baka mbotika. Yandi kele mukristo ve sambu yandi
ke kwendaka na ecole du dimanche, to na bisambu.
Muntu kele mukristo KAKA kana yandi me tula
kivuvu na Yesu Kristo. Kana nge zaba ve mbote-
mbote nde nge me yamba Yesu, kwisa solula ti
mono na nima ya ecodim. Beto lenda sadisa nge
kuzaba mambu yina mbote.

Kana ntangu lunga :

Moniteur, kana ntangu lunga, bana lenda tuba verse
ya kulonguka diaka, ti nge lenda longa mikanda ya
Bible. Tala bangindu na nsuka ya mukanda yai.

==NSUKA YA LESO 15



*Beno fweti talaka bantu yonso
kiteso mosi,
mpidina beno ta zaba kutunga ti
kuzinga na ntoto ya Mfumu
Nzambi ke pesa beno.*

Kulonga 16 :20

Leso 16. Bantu ya Israele bambukaka diaka bamvula ya bo tambulaka na nseke.

I. Preparasio ya Moniteur—

Kulonga 1—2 :23

◎ Kikuma ya lesos :

Bana ta Nzambi bambuka mpila Yandi me sala na kati ya bafami na bo. Bo mpi ta longuka sambu na bifu ya bo me sala.

♥ Verse ya kulonguka :

Mfumu Nzambi, mono ta vila ve/ bisalu na Nge ya nene. Mono ta vila ve/ mambu ya kuyituka ya Nge me sala./ Bankunga 77:12

[Moniteur, tula ton ti ritima sambu bana lenda yimba verse yai.]

☛ Moniteur, yilama na nkunga ya kwenda nzila mosi ti lesos :

Mikanda ya Moize
Nzambi Ke Mbote

II. Kusala Revisio—

↑ Bubuyai beto ke yantika mukanda ya Kulonga. Yo kele malongi ya nsuka ya Moize pesaka na bantu ya Israele ntangu bo vandaka na nseke, na ntwala bo kotaka nsi ya Nzambi zolaka kupesa bo. Yo kele malongi ya nsuka ya Moize mpi, sambu beto me mona dezia nde na ntwala bo kota nsi ya bo, Moize fweti kufwa.

III. Kulonga Bana Leso Yai—

➔ Kuyantika Leso :

Beto yonso kele na kiese kana mwinda elektrika kele na nzo na beto, sambu beto lenda mona na mpimpa, ti mfunu kele ve kusumba petrole konso ntangu kutula na kati ya mwinda. Yo kele kiese to kiese ve ? (Ee, kiese mingi.)

Muntu ya salaka mwinda elektrika ya ntete, zina na yandi Edisone Toma. Keti beno yindula nde mwinda elektrika na yandi, yo salaka mbote na mbala ya ntete yandimekaka yo?

Ikele ve. Yo salaka ve mbala ya ntete yandi mekaka yo, to ya zole, to ya tatu, to ya iya, to ya tanu, to ya kumi, to ya makumi tanu, to ya nkama, to ya nkama tanu, to ya nkama sabanu. Yandi mekaka kusala yo diaka ti diaka. Na nsuka, ya kumeka ya mfunda, yandi nungaka ! Mwinda yina salaka mbote. Konso mbala yo salaka ve, Edisoni tubaka ve nde yandi me rate. Yandi tubaka nde, ‘Mono me longuka mpila mosi ya nkaka ya yo ta sala ve. Mono meka mpila ya nkaka.’

Na histoire na beto ya Bible, ntangu me lunga nde bantu ya Israele kukota na nsi Nzambi silaka bo. Na ntwala kukota, Nzambi zolaka nde bo longuka ndambu baleso. Ntete, Nzambi songaka Moize kusonga diaka ndambu ya bampila Nzambi me sadisa bo, sambu bo longuka na yo.

❖ Developpement—Malongi ya Leso Yai na Banti 4 :

16.1 Moize songaka bantu mutindu Nzambi songaka yandi kutuba. Bo fweti bambuka nde Nzambi me songa bo dezia kukota nsi ya Kanana.

❖ Tangila bana : Kulonga 1 :3-8

(NB : Atasio ! Beto me manisa mukanda ya Kutanga. Ntangu yai, beto me kota mukanda ya Kulonga.)

3 Na mvula ya makumi iya, na nima bantu ya Israele basikaka na nsi ya Ezipre, Moize songaka bo mambu yonso ya Mfumu Nzambi me tuba na yandi.

5 ...Mpidina, Moize yantikaka kulonga bantu ya Israele bansiku ya Nzambi...

«8 Ntoto ya Mono Mfumu Nzambi zengaka nde Mono ta pesa na bankaka na beno Abrahami, Izaki ti Yakobi ti na bana na bo, yo yai. Beno kwenda kubotula yo. Beno tunga. »

❓ Yula bana :

↑ Bana sala bageste :

☛ Bana yimba ti kina :

16.2 Bo fweti bambuka mpila Moize tulaka bambuta sambu na kusadisa yandi.

Tangila bana : Kulonga 1 :9-16

(Moize ke tuba :) 9-12 Kilumbu mosi mono songaka beno nde : ...mono, muntu mosi, nki mpila mono lenda baka kilo ya kukatula makambu na beno yai mingi ?

13-14 Beno sola bantu ya mayele ya konso dikanda, bayina zaba mambu mbote-mbote ; ebuna mono ta tula bo bambuta na beno.” ...Beno ndimaka...

16 Ebuna mono songaka bambuta yina nde : « Beno fweti zenga konso makambu na ntima mosi ya mbote...

? Yula bana :

↑ Bana sala bageste :

↖ Bana yimba ti kina :

6.3 Bo fweti bambuka nde, ntangu bo kumaka na lupangu ya ntoto yina, boma simbaka bo. Bo mosi buyaka kukota.

Tangila bana : Kulonga 1 :20-26

20 Mono songaka beno nde : “Beno me kuma ntangu yai na ntoto...ya Mfumu Nzambi...me pesa beto... Beno wa boma ve. Beno vanda kikesa.

26 Kansi beno salaka mubulu. Beno zolaka kulanda ve mambu ya Mfumu Nzambi, Nzambi na beno, tubaka. Yo yina, beno kotaka na ntoto yina ve...

? Yula bana :

↑ Bana sala bageste :

↖ Bana yimba ti kina :

16.4 Bo fweti bambuka nde bo tambulaka na bantoto ya nkaka, kansi Nzambi buyaka kupesa bo bantoto yina, sambu Yandi me pesa bansi yina na bantu ya nkaka. Bo fweti kinga ntoto Nzambi ta pesa bo nsi.

Tangila bana : Kulonga 2 :1-19

Kulonga 2 :1 Na nima, beto balukaka, beto landaka nzila...

4-5 Nzambi tubaka mpi nde : « Songa bantu ya Israele nde : Beno luta...ntoto ya bampangi na beno bana ya Ezau... Beno lenda nwanisa bo ve, sambu Mono ke pesa beno ntoto na bo ve. Mono me pesaka yo na bana ya Ezau.

8-9 ...Beto landaka nzila yina ke kwenda na nseke ya Moabi. Ntangu yai, Mfumu Nzambi tubaka na mono nde : « Bantu ya Moabi ..., kumonisa bo mpasi ve, kunwanisa bo mpi bitumba ve. Bwala yai ...Mono me pesaka bo yo. Mono ke pesa beno ntoto na bo ve.”

19 ...Bantu ya Amoni.... Kumonisa bo mpasi ve. Kunwanisa bo mpi bitumba ve, sambu Mono ke pesa beno ve ntoto yina ya Mono pesaka bo. »

? Yula bana :

↑ Bana sala bageste :

↖ Bana yimba ti kina :

>|< Kumanisa Leso :

Yo vandaka ndambu mpasi sambu na bantu ya Israele kubambuka mpila Nzambi twadisaka bo mbote, kansi mbala mingi, bo mosi salaka na mpila mosi ya buzoba. Nzambi zolaka kulonga bo sambu ntangu bo kota ntoto na bo, bo sala mbote, bo zinga bamvula mingi na ntoto yina. Keti beto mpi me bambuka, me yindula mpila Nzambi me sala dezia na luzingu na beno ?

♥ Verse ya kulonguka :

[Moniteur, yai kele ntangu ya mbote kulonga verse. Bana tuba yo mbala mosi. Na nima bo yimba yo.]

Devoir sambu na bakristo :

Devoir mono ke pesa beno bakristo, yo yai : Na mposo yai, yindula nki mambu ya mbote Nzambi me sala na luzingu na nge dezia. Kana nge me vanda kwikama ve, lomba ndolula na Yandi, ti lomba nde Yandi pesa nge ngolo kulanda Yandi kuluta mbote na ntangu ke kwisa.

† Kubinga bana ya zaba Yesu ntete ve :

Mbala ya nkaka nge zaba ve kana nge kele mukristo. Nge lenda zaba yo. Muntu kuma mukristo ntangu yandi mona mawa sambu na mbi

yandi me sala, yandi balula ntima, yandi bika nzila yina. Yandi kwikila nde Yesu Kristo, Mwana ya Nzambi, fwaka sambu na kufuta mfuka ya masumu na beto, ebuna Yandi telamaka na lufwa. Kana nge me yilama kubika nzila ya masumu, nge lenda binga zina ya ngolo ya Yesu Kristo sambu Yandi gulusa nge.


Roma 10 :13 ke songa beto nde konso muntu yina ta binga zina ya Mfumu sambu na kugulusa yandi, yandi TA guluka.

Nge lenda binga Yesu sesepi yai na ntima na nge.
Kana nge zola kusolula ti beto na mambu yai, to kana nge zola beto kusamba ti nge sambu na kuyamba Yesu, kaka bikala na nima ya ecodim. Na kiese yonso beto ta sadisa nge.

Kana ntangu lunga :

Moniteur, kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

==NSUKA YA LESO 16



Na ntwala kukota nsi
Nzambi silaka bo, Moize
bamdukisaka bantu ya
Israele mambu yonso ya
mbote ya Nzambi me sala
bo.

Leso 16

*Mfumu
Nzambi,
mono ta
vila ve
bisalu
na Nge*

ya nene.

*Mono ta vila ve mambu
ya kuyituka ya Nge me
sala.*

Bankunga 77:12

Leso 17 Bantu ya Israele nungaka bamvita na este ya nzadi ya Yordani.

I. Preparasio ya Moniteur—

Kulonga 2 :24-31

Moniteur, kuyidika na ntwala :

Sambu na ‘Kulonga Mikanda ya Bible,’ yidika papier na ntwala ya ke tuba mutindu yai na bisono ya nene, ya ngolo :

‘Bo ke binga mukanda ya tanu ya Moize ‘Kulonga ‘ sambu yo ke songa nde Moize

bantu diaka na ntwala
kukota na _____ ya Nzambi silaka bo. »
(Bamvutu : longaka, nsi to ntoto)

◎ Kikuma ya lesos :

Bana ta landa Nzambi ti lemfuka na Yandi, ebuna Yandi ta nungisa bo.

♥ Verse ya kulonguka :

Beno lemfukila bansiku na Mono. Beno sala kaka/ mambu ya Mono ke songa beno/ kusala./ Levi 18:4

☛ Bankunga ya kwenda nzila mosi ti lesos yai :

Landa, Mo’ Ta Landa Nge, Mfumu
Mfumu Zaba Nzila na Mono

II. Kusala Revisio—

▶ Na lesos me luta, beto me mona mpila Nzambi songaka Moize kulonga bantu ya Israele mbala mosi diaka. Na malongi ya Nzambi pesaka Moize kupesa bo, bo vandaka kubambuka mambu zole. Ntete, bo vandaka kubambuka mpila Nzambi me sala na kati na bo, ata bo me landa Yandi mbote mingi ve. Ya zole, bo vandaka kubambuka diaka bansiku yonso ya Nzambi me pesa bo.

Na nima Moize manisa malongi yai, mambu zole ta salama. 1) yandi ta fwa, ti 2) Israele ta kota ntoto ya Nzambi me silaka bo.

III. Kulonga Bana Leso Yai—

Nge lenda mona baleso ya nkaka na--

<https://mwindaproject-ecm.com/free-kituba-language-bible-teaching-resources-for-you/>

➔ Kuyantika Leso :

Bantu lenda sala nsaka yai : Bana telama na ndonga, ebuna mosi kusala bonso, « Papa ». Papa songa bo nki bo lenda sala, mosi-mosi na zina ya mwana, to mbala ya nkaka, na kimvuka na bo yonso. Mbandu : papa lenda tuba nde, « Sara, papa ke tuba nde, kwisa nswalu. » Sara baka ntinu, ebuna « Papa » tuba nde, « Papa tuba nde, Kanga. » Sara fweti kanga. « Papa » tuba nde, « Papa ke tuba, « Beno yonso kwisa fioti. » Bo yonso kwisa fioti, etc. Kansi, kana Papa tuba kaka ‘kwisa,’ kukonda kutuba ntete ‘Papa tuba,’ bo fweti kwisa ve. Makambu ya nsaka yai kele nde bo kuwa, mpi bo sala kaka yina ya Papa me tuba.

Bantu ya Israele me bika Ezipte. Nzambi me twadisa bo kutambula na sika ya zelo na zelo. Na sika ya bo vandaka kutambula, bo me kuta mpi makanda ya bantu ya nkaka. Mbala mingi, Nzambi me songa bo nde, « Beto luta. Beno nwana ve. Mono ke pesa beno ntoto yai ve. Mono me pesa yo na bantu ya nkaka. » Kansi, ata na ntwala bo kwisaka na ntoto ya Kanana ya Nzambi zolaka kupesa bo, Nzambi songaka bo nde, « Bantu yai, beno nwanisa bo. Mono zola pesa beno ntoto na bo. » Nzambi salaka mpidina sambu bantu yina me luta mbi.

Nki mutindu bo ta zaba nde bantu yai ya bo ke kuta, bo nwanisa bo, to bo nwanisa bo ve ? Bo fweti landa Nzambi ti ndinga ya Yandi vandaka kupesa bo.

❖ Developpement—Mambu ya Nene ya Leso Yai na Banti 3:

17.1 Moize bambukisaka bo mpila Yandi me kanga bo nzila kunwanisa bantu ya nkaka, kansi me songa bo kunwanisa bantu ya nkaka.

❖ Tangila bana : Kulonga 2 :24

24 Mfumu Nzambi tubaka diaka nde : « Ntangu yai, beno katuka awa, beno sabuka nzadi... Mu-Amore yai zina ya Sihoni...Mono ke pesa yandi ti ntoto na yandi na maboko na beno. Beno kwenda kunwanisa yandi bitumba. Beno botula ntoto na yandi.

? Yula bana :

† Bana sala bageste :

‡ Bana yimba ti kina :

17.2 Bo lombaka Sihoni nzila nde bo luta na ntoto na yandi, kansi yandi buyaka kupesa bo nzila.

Tangila bana : Kulonga 2 :26, 30

26 (Moize ke tuba) Ebuna kuna na ntoto ya zelo na zelo ...mono tindaka bantu na Sihoni...na kulomba nzila sambu na kuluta...

30 Kansi Mfumu Sihoni zolaka ve beto luta na ntoto na yandi...

? Yula bana :

† Bana sala bageste :

‡ Bana yimba ti kina :

17.3 Sambu yandi buyake kupesa bo nzila, bo nwanisaka Sihoni, ti Nzambi nungisaka bo.

Tangila bana : Kulonga 2 :31-36

31 Mfumu Nzambi tubaka na mono nde : « Mono ke katula ngolo ya Sihoni ti bantu na yandi sambu na beno. Beno kwenda botula ntoto na yandi, ebuna beno tunga. »

32-33 Sihoni ti bantu na yandi yonso, bo kwisaka kunwanisa beto ...kansi Mfumu Nzambi, Nzambi na beto, pesaka yandi na maboko na beto....

36 Mfumu Nzambi pesaka beto babwala yai yonso... Ata bwala mosi ve lutaka beto na ngolo.

? Yula bana :

† Bana sala bageste :

‡ Bana yimba ti kina :

17.4 Kansi, bo buyaka kunwana na bisika ya Nzambi me buya kupesa bo.

Tangila bana : Kulonga 2 :37

37 Kansi beto kumaka ve penepene na...konso kisika ya Mfumu Nzambi songaka beto ve kukwenda.

? Yula bana :

† Bana sala bageste :

‡ Bana yimba ti kina :

>|< Kumanisa Leso :

Nki mutindu bantu ya Israele zabaka nki kusala ? Wapi kunwana ? Nzambi songaka bo, ebuna bo landaka kaka Yandi. Beto kiteso mosi, beto fweti landa yonso ya Nzambi ta songa beto. Ebuna Yandi ta nungisa beto.

Verse ya kulonguka :

[Moniteur, yai kele ntangu ya mbote kulonga verse. Bana lenda tuba yo mbala tatu, na nima kabisa bana na bandambu zole. Ndambu ya ntete yantika kutuba ndinga ya ntete, ndambu ya zole ndinga ya zole, etc. Bo tuba yo mbala tatu mutindu yina.]

Devoir sambu na bakristo :

Devoir mono ke pesa beno bakristo na mposo yai, yo yai :

Beno tula ngolo kulanda yonso ya nge ke longuka na kati ya Bible, sambu Nzambi kusadisa nge. Konso lumbu mposo yai, kudiyula : Nki mono zaba kusala, kansi mono ke sala yo ve ? Kana Nzambi songa nge mambu mosi ya nge ke sala ve, tula ngolo kulemfuka na Yandi, kusala yo.

Kubinga bana ya zaba Yesu ntete ve :

Kana nge zaba ve tii ntangu yai nde kieleka, nge kele mukristo, nde kieleka nge me guluka, ntangu ya mbote kuzenga mambu yina, yo yai. Binga zina ya Yesu ti lomba Yandi kugulusa nge. Kana nge zola lusadisu na mambu ya kuguluka, kwisa vanda awa na nima ya ecodim. Beto ta kwisa, beto ta sadisa nge.

Kana ntangu lunga :

Kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

====NSUKA YA LESO 17

Leso 17



*Beno
lemfukila
bansiku
na Mono.
Beno sala
nkaka
mambu
ya Mono
ke songa
beno
kusala.*

Levi 18:4

Leso 18 Moize bambukisaka bantu ya Israele bansiku yonso ya Nzambi me pesa bo.

I. Preparasio ya Moniteur—

Kulonga bakapu 4-30 (Somere)

◎ Kikuma ya lesos :

Bana ta lemfuka na ndinga ya Nzambi sambu bo zola Yandi.

♥ Verse ya kulonguka :

(Yesu nde :) “Kana beno zola Mono, / beno ta londa/ bansiku na Mono./” Yoane 14:15

❖ Bankunga ya kwenda nzila mosi ti lesos :

Bansiku Kumi ya Kulanda
Kana Beno Ke Zolaka Mono

II. Kusala Revisio—

- Bisika ya nkaka bantu ya Israele nwanisaka bantu ya ntoto yina. Bisika ya nkaka bo nwanisaka bo ve. Nki luswaswanu na kati ya bisika yina ?
(Kaka mpila Nzambi songaka bo kusala—ntangu ya nkaka kunwana, ntangu ya nkaka kunwana ve.)

III. Kulonga Bana Leso Yai—

➔ Kuyantika Leso :

Beto tubaka nde mukanda ya Kulonga vandaka na mambu zole. Mosi beto me mona dezia—kureviser ndambu ya histoire ya Israele tii ntangu yina. Beto me kuma na mambu ya zole—kureviser bansiku ya Nzambi na ntwala bo kota ntoto ya Nzambi silaka bo.

❖ Developpement—Mambu ya Nene ya Leso Yai na Banti ya Malongi 4 :

18.1 Moize bambukisaka bantu ya Israele nde bo fweti wila bansiku ya Nzambi. Bo yika ve, bo katula mpi ve. Mpidina bo ta pesa mwinda sambu na bantu ya nkaka.

 **Tangila bana :** Kulonga 4 :1-8

1 ...Beno landa bansiku yonso ya Mono Nzambi ke songa beno. Mpidina beno ta fwa ve, beno ta tunga na ntoto yina ya Mfumu Nzambi...ke pesa beno.

2 Na mambu yai ya Mono ke songa beno, beno lenda yika to katula mambu ya nkaka ve...

5 (Moize nde :) Mono me longaka beno bansiku yonso, mutindu Mfumu Nzambi...songaka mono. Beno landa yo na ntoto ya beno ke kwenda.

6-8...Mpidina beno ta monika mayele na meso ya bantu ya nkaka. Ntangu bo ta wa bansiku yai yonso, bo ta tuba nde : « Bantu yai kele bantu ya mayele-e ! ” ...Keti bantu ya nkaka kele yina ke na bansiku ya mbote bonso yai ?

? Yula bana :

↑ Bana sala bageste :

❖ Bana yimba ti kina :

18.2 Bo songa bansiku ya Nzambi na bana ti bantekolo na bo sambu yo pesa bo mwinda mpi. Bo keba nde bo samba Nzambi kaka, biteki ve.

 **Tangila bana:** Kulonga 4 :9, 16, 19

9 Beno keba ! ...Beno tela bana na beno ti bantekolo na beno.

16,19 Beno sala masumu ve na kusala biteki...Beno tula ngindu ve na kusambila to kusadila bima ya beno ke monaka na zulu : ntangu, ngonda, bambwetete...

? Yula bana :

↑ Bana sala bageste :

❖ Bana yimba ti kina :

18.3 Bo kuma lulendo ve kuyindula nde, kele sambu na mambote na bo nde Nzambi me pesa bo ntoto.

 **Tangila bana :** Kulonga 9 :4-5

4-5 Ntangu Mfumu Nzambi....me kula bantu yina imene, beno lenda tuba ve nde : « Mfumu Nzambi me nata beto awa, sambu beto kele bantu ya mbote. » Ve, Mfumu Nzambi ta kula bantu yina kaka sambu bo me salaka mbi...sambu Yandi zola

lungisa mambu ya Yandi silaka na bankaka na beno

Yandi, ti landa bansiku na Yandi yonso...

? Yula bana :

Yula bana :

† Bana sala bageste :

‡ Bana yimba ti kina :

‡ Bana yimba ti kina :

18.4 Bo fweti landa ve kikalulu ya bantu ya ntoto yina. Nzambi ta sakumuna bo kana bo lemfuka, kansi Yandi ta singa bo kana bo lemfuka ve.

 **Tangila bana :** Kulonga 7 :2-4, 18 :9-12, 30 :16

2 Ntangu Mfumu Nzambi...ta pesa bantu yai na maboko na beno, beno ta bedisa bo... Beno lenda wakana na bo ve...

3-4 Beno lenda kwela bo ve. Mbaimbai bo ta benda bana na beno kuvila Mono, Mfumu Nzambi, ti kusamba banzambi ya nkaka...

18 :9-11 Ntangu beno me kuma na ntoto ya Mfumu Nzambi... ta pesa beno, beno landa ve mambu ya mbi ti ya nsoni ya bantu ke sala kuna, mutindu ke salaka banganga-ngombo, to bantu ya ke tuba mambu ke kwisa na ntwala, to bandoki, to banganga nkisi, to bantu ya ke kwenda kuyula mambu na bantu ya me fwaka.

12Yo yina Mfumu Nzambi ke kula bantu ya ntoto yina na ntwala na beno...

30:16 Kana beno zola Nzambi, ...beno lemfuka na

? Yula bana :

† Bana sala bageste :

‡ Bana yimba ti kina :

>|< Kumanisa Leso :

Bana, Moize pesaka bantu ya Israele malongi yai sambu bo bambuka kulanda bansiku ya Nzambi ntangu bo kota ntoto na bo. Beto bubuyai, bakristo, beto mpi bambuka kulanda bansiku ya Nzambi, kaka sambu beto zola Yandi.

 **Devoir sambu na bakristo :**

Mono ke pesa beno bakristo devoir yai : Na mposo ke kwisa, beno tula ngolo ve kulemfuka na mambu yonso ya nge zaba ya ndinga ya Nzambi, kaka sambu beno zola Yandi.

 **Kubinga bana ya zaba Yesu ntete ve :**

Kana nge me yilama kuyamba Yesu bubuyai, kwisa na mono na nima ya ecodim. Mono ta vanda na kiese kusonga nge mpila nge lenda yamba Yandi.


Kana ntangu lunga :

Kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

====NSUKA YA LESO 18

Leso 18

*(Yesu
nde:) “Kana
beno
ke zola
Mono,
beno ta landa
bansiku na Mono.”*



Yoane 14:15

Leso 19 Moize manisaka kisalu Nzambi pesaka yandi, ebuna yandi fwaka na lukamu ya Nzambi.

I. Preparasio ya Moniteur—

Kulonga 31, 32 :48-52, 34 :1-9 (Somere)

◎ Kikuma ya lesos :

Bana ta vanda na ngemba na ntangu ya lufwa,
sambu Nzambi kaka ke pesa moyo, ti Yandi kaka
lenda baka yo diaka.

♥ Verse ya kulonguka :

« *Mfumu Nzambi Yandi mosi ta nataka nge*, / *Yandi ta vandaka ti nge*. / *Yandi ta bikisa nge ve ata fioti*. /
Kuwa boma ve. / » Kulonga 31 :8

↖ Bankunga ya kwenda nzila mosi ti lesos :

Ngemba Ikele
Keti Nge Me Yilama Mbote ?

II. Kusala Revisio—

- ▶ Ntangu ya histoire yai, bana ya Israele vandaka wapi ? (Penepene na ntoto ya Kanana, ntoto ya Nzambi silaka bankaka na bo.)
- ▶ Moize me sala nki na ntwala bo kota ntoto ya Nzambi ta pesa bo ? (Yandi me bambukisa bo bansiku ya Nzambi me pesa bo, mpi mpila Yandi me sala na kati na bo.)

III. Kulonga Bana Leso Yai—

→ Kuyantika Leso :

Kana bantu awa na bwala yai zola kutuba nde
muntu me fwaka, nki mutindu bo tuba yo ?
(Moniteur, kuwa bamvutu ya bana mutindu na
mutindu.)

Mpila mosi mona zola mingi kutuba yo kele
« Nzambi me baka moyo na yandi. » Mono zola yo
sambu yo kele kieleka. Nzambi pesa beto moyo na
kati ya divumu ya mama, ti Nzambi kele na kiyeka
kubaka yo diaka.

Ntangu ya histoire yai, Moize me kuma penepene
na nsuka ya moyo na yandi. Bantu ya Israele

vandaka penepene kukota ntoto ya Nzambi silaka
bo. Beno ta bambuka nde Nzambi zengaka nde
Moize lenda kota ve, sambu yandi lemrukaka ve ti
pesaka Nzambi lukumu ve ntangu bantu waka nzala
ti Nzambi pesaka bo masa.

❖ Developpement—Mambu ya Nene ya Leso Yai na Banti 4 :

19 :1 Ntangu lungaka na lukamu ya Nzambi nde
Moize kufwa. Yo yina, Moize songaka bantu ya
Israele nde bo vanda kikesa. Bo ta baka ntoto ya
Kanana, sambu Nzambi ta kwenda ti bo.

❖ Tangila bana : Kulonga 31 :1-6

1-2 Moize tubaka diaka na bantu ya Israele nde :
“Mono me kuma mbuta. Mfumu Nzambi songaka
mono... nde mono ta sabuka nzadi ya Yordani ve.

3-5 Yandi mosi Mfumu Nzambi, Nzambi na beno, ta
kwenda na ntwala na beno. Yandi ta fwa bambeni
na beno, ebuna beno ta botula ntoto na bo. Yozue
muntu ta nata beno mutindu Mfumu Nzambi me
tuba... Mfumu Nzambi ta nungisa beno...

6 Beno vanda ngolo ti kikesa. Beno tina bantu yina
boma ve. Mfumu Nzambi...ta bikisa beno ve ata
fioti.”

? Yula bana :

↑ Bana sala bageste :

↖ Bana yimba ti kina :

19.2 Nzambi songaka Yozue nde yandi ta
twadisa bantu, ti Nzambi ta twadisa yandi.
Ebuna Moize tulaka Yozue maboko na nzo-
Nzambi, mutindu Nzambi songaka yandi kusala.

❖ Tangila bana : Kulonga 31 :7-8, 14, 23, 34 :9

7 Ntangu yai, Moize bingaka Yozue. Ebuna yandi
tubilaka yandi na meso ya bantu yonso ya Israele
nde : « Vanda ngolo ti kikesa. Nge muntu ta nata
bantu yai kubaka ntoto ya Mfumu Nzambi zengaka
nde Yandi ta pesa na bankaka na bo.

8 Mfumu Nzambi Yandi mosi ta nataka nge...

Verse ya Kulonguka :

[Moniteur, yai kele sika ya mbote ya kusonga bana verse ya kulonguka. Nge tangila bo mbala mosi. Na nima bo landa nge malembe-malembe, fraze na fraze. Bana lenda tuba yo diaka na nima ya lesosambu na ntangu lunga. Yai bandinga Moize ke tuba na kilandi na yandi, Yozue.]

31 :14 *Ntangu yai, Mfumu Nzambi tubaka na Moize nde : « Nge ta zinga diaka mungi ve. Binga Yozue. Moize ti Yozue kwendaka na Nzo-Nzambi ya ntenta...*

23 ...*Mfumu Nzambi tubaka na Yozue...nde : « Vanda ngolo ti kikesa. Nge muntu ta nata bantu ya Israele na ntoto ya Mono silaka kupesa bo...»*

34 :9 *Yo yina, bantu ya Israele yantikaka kulemfuka na Yozue...*

? Yula bana :

† Bana sala bageste :

* Bana yimba ti kina :

19.3 Nzambi pesaka Moize kisalu mosi ya nsuka—Kulonga bantu ya Israele nkunga kusadisa bo kubambuka mambu yai.

Tangila bana : Kulonga 31 :19, 22

19 « *Ntangu yai, sonika nkunga yai ya Mono ke pesa nge. Longa yo na bantu ya Israele. Bo zaba yo mbote-mbote, mpidina yo ta vanda bonso ntemwe na Mono ...*

22 *Kilumbu yo yina, Moize sonikaka nkunga ya Nzambi pesaka yandi. Yandi longaka yo mpi na bantu ya Israele.*

? Yula bana :

† Bana sala bageste :

* Bana yimba ti kina :

19.4 Moize pesaka bo lusakumunu ya nsuka, ebuna yandi fwaka na ngemba.

Tangila bana : Kulonga 33 :1, 32 :48-51, 34 :1-6

33 :1 ...*Moize...sakumunaka bantu ya Israele ntangu yandi me fwa ntete ve.*

32 :48-49 *Kilumbu yo yina Mfumu Nzambi tubaka na Moize nde :« Kwenda...tombuka na ngumba ya Nebo, ebuna nge tala ntoto ya Kanana ya Mono ke pesa na bantu ya Israele.*

50-51 *Nge ta fwa kuna na zulu ya ngumba yango, mutindu fwaka mbuta na nge Aroni, sambu beno yonso zole, beno lemufuka na Mono ve....beno pesaka Mono nsoni na meso ya bantu ya Israele.*

34:1-3 *Moize...tombukaka na ngumba ya Nebo. Yandi kumaka tii na nsongi ya ngumba... Ebuna ko kuna Mfumu Nzambi songaka yandi ntoto...yonso...*

4 *Ntangu yai, Mfumu Nzambi tubaka na Moize nde : « Yai kele ntoto ya Mono silaka Abrahami, Izaki ti Yakobi nde Mono ta pesa bana na bo. Mono me songa nge yo, kansi nge ta kota muna ve. »*

5-6 *Yo yina Moize...fwaka kuna... Nzambi Yandi mosi zikaka yandi...*

? Yula bana :

† Bana sala bageste :

* Bana yimba ti kina :

>|< Kumanisa Leso :

Bana, Moize manisaka kisalu ya Nzambi pesaka yandi kusala. Ebuna yandi fwaka na ngemba. Ata Nzambi pesaka yandi nzila ve kukota na nsi ya Yandi silaka bo, Moize bokutaka ve. Yandi monaka nde yo vandaka luzolo ya Nzambi. Bantu ya Nzambi, kana ntangu me kwisa sambu na Nzambi kubaka moyo na bo, bo ke fwaka na ngemba.

Devoir sambu na bakristo :

Beno bakristo, devoir mono ke pesa beno mposo yai kele kaka kutonda Nzambi sambu na ngemba Yandi pesa beto bakristo, ata na luzingu, ata na lufwa.

Kubinga bana ya zaba Yesus ntete ve :

Kansi kieleka, kana nge me yamba Yesu Kristo ntete ve, nge ta vanda na ngemba yai ve, kikesa yai ve. Sambu na nge, lufwa lenda vanda mambu mosi ya boma. Kansi yo fweti vanda mutindu yina ve. Bible ke songa beto nde Nzambi ke zola ve ata

muntu mosi kuvila, kansi bantu yonso kubalula ntima (2 Piere 3 :9). Keti nge ta balula ntima na Yesu bubuyai? Nzambi kele kukinga nge. Maboko na Yandi kele ya kukangula sambu na kuyamba nge.

Kana nge ke na mfunu ya lusadisu na mambu yai, kwisa na mono na nima ya ecodim. Mono ta vanda na kiese mingi kusadisa nge.

Kana ntangu lunga :

Kana ntangu lunga, bana lenda tuba verse ya kulonguka diaka, ti nge lenda longa mikanda ya Bible. Tala bangindu na nsuka ya mukanda yai.

NSUKA YA MUKANDA YA KULONGA

====NSUKA YA LESO 19



Leso 19

Nzambi pesaka Moize
kisalu ya nsuka—Kulonga
bantu nkunga. Yina mosi
ya bisalu ya nsuka Nzambi
pesaka yandi.

*« Mfumu Nzambi Yandi
mosi ta nataka nge,
Yandi ta vandaka ti nge.
Yandi ta bikisa nge ve ata
fioti.*

Kuwa boma ve. »

Kulonga 31 :8

Leso 20 Revisio ya mikanda ya Kutanga ti Kulonga

Moniteur, kuyidika na ntwala :

Sambu na nsaka « Mono Kele Nani ? » nata craie to na markeur kusadila ntangu nge ke longa.

Sambu na bakarte, sosa lusadisu ya muntu ya ke sonika mbote, yandi sonika na carte na kati ya malongi.

Mikanda ya Moize na nkufi :

Kutanga ti Kulonga nsuka ya mikanda tanu ya Moize.

Mukanda ya Kutanga me songa beto mpila bantu ya Israele buyaka kukota ntoto ya Nzambi silaka bo, ti mpila bo tambulaka bamvula 40 na nseke ya zelo na zelo.

Bana tuba na ritima :

Bo buyaka kukota ntoto,
Bo tambulaka bamvula 40.
Beto mona yo na mukanda ya
Kutaaaanga.

Na mukanda ya Kulonga, bantu ya Israele me kuma diaka na lupangu ya ntoto ya Nzambi silaka bo. Yo kele mukanda ya revisio, sambu Moize tubaka diaka bansiku ya Nzambi me pesa bo, ti mpila Yandi me sala na kati na bo. Yo kele mukanda ya kuyilama, sambu bo ke yilama kukota ntoto na bo. Na mukanda yai, beto mona mpila Moize manisaka kisalu na yandi. Ebuna yandi kufwaka na ngemba, na ntwala bantu kotaka na ntoto ya Kanana.

Bana tuba na ritima :

Bambuka diaka bansiku ya Nzambi,
Bambuka yonso ya Nzambi me sala.

Nge lenda mona baleso ya nkaka na--

<https://mwindaproject-eclm.com/free-kituba-language-bible-teaching-resources-for-you/>

Yilama kukota ntoto ya Kanana,
Yai kele mukanda ya Kuloooooonga.

Karte ya Kubokuta :

Nzambi ke zola ve kubokuta, kansi na mukanda ya Kutanga, beto mona nde mbala mingi, bantu ya Israele me bokuta.

Beto me mona mbala 8 ya bo bokutaka.
Beto meka kubambuka yo. Moniteur, tala karte mpila beto me completer yo. Ata bana bambuka yo na ndonga to na ordre ve, kana bo bambuka mambu mosi, muntu ya ke sadisa nge lenda kaka sonika yo na sika na yo na zulu ya carte. Nge songa yandi wapi ti nki kusonika.

Tala page ke kwisa sambu na bakarte.

**Karte ya Revisio sambu na Bana ya
Niveau na Zulu :**

Sala karte ya mpamba bonso yai :

Bo bokutaka nki ? Nki salamaka ? Kapu

Kana mwana tuba nde bo bokutaka masa ya kunwa, nge ta songa nsadisi kusonika bonso yai :

Masa ya kunwa	Tuba na ditadi kupesa bo masa	Kapu 20

**Ntangu beno manisa karte, yo ta monika
mutindu yai :**

Mpamba- mpamba	Tiya na kampe	Kapu 4
Kudia mbisi	Bandeke bonso ngwadi	Kapu 11
Nkento ya Moize	Miriami kumaka lepre	Kapu 12
Bo buya kukota ntoto ya Kanana	Bamvula 40 na nseke	Kapu 14
Bo nwanisa bantwadisi (Kora)	Tiya, ntoto kangulaka	Kapu 16
Bo yindula Moize & Aroni me fwa Kora	Maladi ya ngolo	Kapu 17
Masa ya kunwa	Tuba na ditadi kupesa bo masa	Kapu 20
Kutambula na nseke	Nioka ya makasi	Kapu 21

Mono kele nani ?

Moniteur, tangila bana bakestio na nsi, kansi songa ve muntu yina kele nani. Mwana ya ntete kutuba mbote zina ya muntu yina kele shampio. Yandi kwisa kutelama na ‘ligne ya bashampio’. Na nsuka, bana yonso tuba « O yea ! » sambu na bo.

Bakestio sambu na ‘Mono kele nani ?’

Bakala--Ntoto kangulaka, yo minaka mono
ti bima yonso na mono, sambu mono
twadisaka bantu kubuya ntwadisi Nzambi
pesaka bo. Mono vandaka rebele. Mono
kele nani ?
(Kora)

Nkento—Mono kumaka lepre sambu mono tongaka Moize na mambu ya nkento na yandi. Bo tulaka mono na nganda ya campe bilumbu 7. Mono vandaka mbuta ya Moize ya nkento. Mono kele nani ? (Miriami)

Bakala—Nzambi ponaka mono kuvanda Mfumu ya Banganga-Nzambi, kutwadisa bantu na bisambu. Mono nani ? (Aroni)

Bakala-Mfumu Balaki songaka mono mbala tatu kusinga bantu ya Israele, kansi mono monaka nde Nzambi me sakumuna bo dezia. Yo yina, mpila kusinga bo vandaka ve. Mpunda na mono monaka wanzio ya zolaka kukanga mono nzila kukwenda. Mono nani?

(Balami)

Bakala-Mono kotaka ve na ntoto ya Nzambi silaka Israele, sambu mono yalaka ve makasi na mono. Nzambi songaka mono kutuba na ditadi, yo pesa masa. Kansi na makasi mono bulaka yo mbala zole. Mono mpi pesaka Nzambi lukumu ve na mambu yina. Yo yina, mono fwaka na ntwala bantu ya Israele kotaka ntoto ya Nzambi silaka bo.

Nzambi Yandi mosi zikaka mono. Mono nani ?
(Moize)

Eksibisio sambu na bibuti

Kana pasteur ndima, bana lenda sala pratike, bo kitula bakestio yai program sambu na kusonga bibuti na nzo-Nzambi. Mwana ya ke tanga mbote mingi tanga bakestio, mwans mosi na konso kestio, kana mpila ikele. Na nima, bana yonso na kimvuka pesa zina ya muntu yina. Bana zole mpi lenda tuba verse ya bo me longuka.

Atasio! Yai lomba pratike. Mbala ya nkaka, sala pratike dimanche mosi na ntwala kusala eksibisio.

Yai kele okasio bana lenda songa nki bo me longuka, ti pasteur lenda benda bibuti ya nkaka kutinda bana na bo na ecodim sambu bo longuka bima ya kitoko mpi.

Mukanda ya Kuyantika

Kapu 1-2

Kapu 2

Kapu 3 Kapu 4

Kapu
6-9

Kapu
11

Kapu



Luyantiku
Nzemono

Adami
Ti Eva

Makwela

Kaini
Kufwa

Abele

Masa ya
Nene

Nzo ya Nda

Rebelio


Na Babelé

Kiteso
ya
4,000

2,400

2,200

Bamvula na ntvala ya Yesu



Bamvula na ntvala ya Yesu



1,490
Levi
Kapu
1-27

1,570

1,490



Mikanda ya Kutanga ti Kulonga

<p>Kapu 1-4</p>  <p>Kutanga Bafami</p>	<p>Kapu 13-14</p>  <p>Kapu 11-12</p> <p>Kubokuta</p>	<p>Kapu 20</p>  <p>Kapu 16</p> <p>Kora Twadisa Rebelio</p>
<p>Kapu 21</p>  <p>Nioka ya Bronze</p>	<p>Kapu 22-24</p>  <p>Balami Ienda singa</p>	<p>Kapu 20</p>  <p>Makasi ya Moize</p>
<p>Kapu 1-30</p>  <p>Kubambuka, to Kulonga Diaka</p>	<p>Kapu 32-34</p>  <p>Kukabisa Ntoto</p>	<p>Kapu •</p> <p>Kapu •</p> <p>Kapu •</p>
<p>Kapu 31-34</p>  <p>Lufwa ya Moize</p>	<p>Kapu •</p> <p>Kapu •</p> <p>Kapu •</p>	<p>Kapu •</p> <p>Kapu •</p> <p>Kapu •</p>

1,490 **1,450**

Bamvula na ntswala ya Yesu

BANGINDU SAMBU NA KULONGA MIKANDA YA BIBLE

Mukanda na Mukanda :

[Moniteur, yula bana disongidila ya batitre ya mikanda ya Moize, ti sambu na nki bo me pesa konso mukanda titre na yo.]

Kuyantika—Luyantiku ya bima yonso, katula Nzambi yina kele mvu ya mvu.

Kubasika—Nzambi basisaka bantu ya Israele na kimpika na Ezipre.

Levi—Nzambi pesaka bansiku ya bisambu ti ya kinganga na bana ya Levi.

Kutanga—Mbala zole bo tangaka bantu ya Israele, bo tambulaka na nseke, bo pesaka Nzambi makasi na kubokuta na bo.

Kulonga—Moize longaka bantu ya Israele diaka, mbala ya nsuka, na ntwala bo kotaka nsi ya Kanana ya Nzambi pesaka bo.

Yimba nkunga, ‘Mikanda ya Moize’-- Na nima, bana tuba mikanda yina tanu na ndonga. Kana bana zaba yo mbote, bo tuba yo mosi-mosi. Na nima, bo tuba yo na reverse.

Kubakisa batitre ya mikanda. Bana tuba mikanda 5 ya Moize. Sambu na nki bo binga mukanda ya iya ya Bible « Kutanga » ? (Sambu mukanda yina ke songa mpila bo tangaka bafami ya Israele mbala zole.) Sambu na nki beto ke binga mukanda ya tanu ya Bible “Kulonga” ? (Sambu Moize vandaka kulonga bantu diaka na ntwala bo kota nsi ya Nzambi silaka bo.)

Kuyindula ordre ya mikanda--Sala bapapie 10—batitre ya mikanda ya Moize 5, ti bapapie 5 ntendula nki kele na konso mukanda. Balula ordre na yo, ti pesa bana 10. Bo kwisa na ntwala ya bana ya nkaka. Bana ya kele na zina ya mukanda ya Bible, bo telama na ndonga, mukanda ya ntete tii

na nsuka. Bana yonso tanga batitre ya mikanda yina.

Na nima, konso muntu ya kele na titre ya mukanda, yandi sola nki papie ke tendula nki kele na mukanda yina. Bana ya nkaka ndima to buya nde yandi me sala mbote. Na nsuka, bana yonso tanga batitre ti ntendula na yo na ndonga.

Nsaka ‘Na nki mukanda ?’-- Bana yimba nkunga, ‘Mikanda ya Moize.’ Na nima, tula bana zole-zole. Mosi yula mwana ya zole ngiyufula mosi ya yantika, ‘Na nki mukanda....’ Mwana ya zole pesa mvutu. Bana bo mosi yindula nki kuyula.

Mbandu :

Mwana ya ntete-- Na nki mukanda bana ya Israele basika na kimpika ? (Mvutu ya mwana ya zole—Mukanda ya Kubasika)

Mwana ya zole-- Na nki mukanda Nzambi bingaka Abrami ? (Mvutu ya mwana ya tatu—Mukanda ya Kuyantika)

Kumona yo na Bible – Sosa Babible ya Kituba ya bana lenda sadila. Bana sosa kumona ntete mikanda. Bo tala titre na zulu ya page. Na nima, bo sosa kumona bakapu. Kusala yo, bo tala banombre na zulu ya page ti banombre ya nene na nsi. Na nima, bo sosa kumona baverse. Kusala yo, bo tala banombre ya fioti. (Sala yai ndambu-ndambu na ndambu bamposo.)

Kumona yo nswalu – Na nima bana me yikama kuzaba nki mutindu kusosa verse, sala competitio kumona nani lenda verse ntete.

Nki mukanda ? Sala bakarte tatu kiteso mosi. Na fase mosi, sonika na mosi, « na nima ». Na ya nkaka sonika, « na ntwala », ti na ya nkaka, « yo mosi. » Moniteur tuba nombre ya mukanda. Par exemple, « Mukanda ya zole. » Na nima, bo fweti

sola karte mosi kukonda kumona nki yo
tuba. Kana yo tuba « Na ntwala, » bo fweti
songa mukanda na ntwala ya mukanda ya
zole--Kuyantika. Kana yo tuba « Yo mosi »,
bo tuba mukanda ya zole, yo mosi, etc.

Mikanda na chaine—Mwana mosi tuba
mukanda ya ntete (Kuyantika), ya zole tuba
Kubasika, etc. tii na mukanda Kulonga. Na
nima, bo yantika diaka.

Bankunga beto sadila na mukanda yai

Moniteur, atasio ! Kana nkunga kele na kidimbu
♪ na ntwala ya titre, yo songa nde nge lenda kuwa
misika na yo na YouTube, canal Ecodim Congo, mpi
na site [www.mwindaproject-eccm.com/free-kituba-language-bible-teaching-resources-for-you/](https://mwindaproject-eccm.com/free-kituba-language-bible-teaching-resources-for-you/)

Bafourmi Kele Ngangu

Bafourmi kele ngangu
Bo ke na kapita ve
Kansi bo ke sosaka madia
Na ntangu ya mbote.
Ntangu musibi kwisa
Bo yonso dia mbote
Sambu bo mene kuyilama
Na ntangu ya mbote !

Baka Lukumu

Na luzingu na mono
Baka lukumu
Baka lukumu
Na luzingu na mono
Baka lukumu bubu.

♪ Bansiku Kumi Kulanda

Nzambi kuplesaka
Bansiku kumi (3x)
Ya beto fweti kulanda.

Ntete, kusamba kaka
Yandi, Nzambi (3x)
Nsiku ya ntete kulanda

Ya zole, sala biteki
Ve, Ve, Ve ! (3x)
Nsiku ya zole kulanda

Ya tatu, zitisa
zina ya Nzambi (3x)
Nsiku ya tatu kulanda

Ya iya, zitisa
Kilumbu kupema (3x)

Nge lenda mona baleso ya nkaka na--
<https://mwindaproject-eccm.com/free-kituba-language-bible-teaching-resources-for-you/>

Nsiku ya iya kulanda

Ya tanu, zitisa
Tata ti mama (3x)
Nsiku ya tanu kulanda

Sambanu, Kufwa muntu
Ve, ve, ve ! (3x)
Nsiku ya sambanu kulanda

Nswambadi, Kusala
bizumba ve (3x)
Nsiku ya nswambwadi kulanda

Ya nana, kuyiba ve
Mpangi na nge (3x)
Nsiku ya nana kulanda

Ya uvwa, kutuba
luvunu ve (3x)
Nsiku ya uvwa kulanda

Ya kumi, yuma ntima ve
Na bima ya mpangi (3x)
Nsiku ya kumi kulanda !

♪ Beto Bakristo Sadisana

Beto bakristo sadisana
Beto bakristo sadisana
Beto bakristo sadisana
Yo kele mbote.

Beto Zolana

Na dikanda ya Nzambi,
mambu me luta nene—zola !
Zola me luta nene ! (2x)
(Beto zolana)

Bana ya Nzambi, beto zolana !
Zola me luta nene ! (Beto zolana)
Bana ya Nzambi, beto zolana !
Zola me luta nene !

Bu Yesu Kele na Mono

Bu Yesu kele na mono
Ngemba kele ! Ngemba kele !
Ngemba kele !
Bu Yesu kele na mono
Ngemba kele, na ntima na mono !

Ngemba ! Ngemba ! Ngemba ! Ngemba !
Bu Yesu kele na mono,
Ngemba kele
Na ntima na mono !

Kana Beto Kwenda na Nzila ya Nzambi (mvutu adaptasio)

Kana beto kwenda na nzila ya Nzambi
Yandi ke pesa beto ngolo
Beto lunga sala luzolo na Yandi
Tula ntima ye kulemfuka

Tula ntima, ye kulemfuka.
Beto ta mona kiese bu beto sala yo.

Kana Nge Zaba Nge Me Vuluswa

Kana nge zaba nge me vuluswa,
Bula maboko ! XX
Kana nge zaba nge me vuluswa, bula
maboko ! XX

Mvutu :

Kana nge me vuluswa,
Luzingu ta songa
Kana nge zaba nge me vuluswa,
Bula maboko ! XX

Keti Nge Me Butuka Diaka ?

Keti nge me butuka diaka ?
Keti nge me butuka diaka ?
Keti Yesu ke na nge
Keti Yesu songa nge
Nge me kumaka ya mpa ?
Keti nge me yilama mbote
Kutelama na ntwala n'Yandi ?

Kana nge fweti kufwa
Keti nge me yilama ?
Keti Nge ZABA ZABA Zaba Kieleka,
Keti nge zaba nge me yilama?

¶ Kikesa Kele

Kikesa kele
'Ntwala Nzambi
Sambu Yesu me vulusa mono !
Butamaka na Mpeve n'Yandi ,
Yandi kusukulaka ntima !

Mvutu :

Nkunga na mono
ya kiese, yo yai :
kembila Yesu, ntangu yonso !
Nkunga na mono
ya kiese, yo yai :
kembila Yesu, ntangu yonso !

Kudikulumusa na Meso ya Nzambi

Kudikulumusa na meso ya Nzambi
(Kudikulumusa na meso ya Nzambi)
Kudikulumusa na meso ya Nzambi
(Kudikulumusa na meso ya Nzambi)

Ye Yandi ta nangula nge (Lumbu na lumbu)
Ye Yandi ta nangula nge !

Kuwa Bible (vs-lemfuka)

Kuwa Bible
Tanga Bible
'Buna Nge
Ta mona
Nzila mbote mingi
Nzila mbote mingi
Ye ngangu
Ye ngangu

Kuwa Bible
Tanga Bible
'Buna nge

Lemvuka
Nge ta mona kiese !
Nge ta mona kiese !
Ye ngemba !
Ye ngemba !

Kwenda na Yesu

Kwenda na Yesu
Konso lumbu
Kwenda na Yandi
Kwenda na Yesu
Kwenda na Yesu kaka !

Kwisa na Yesu Kristo

Kwisa na Yesu Kristo (3X)
Nge ata guluka !

Landa, Mo' ta Landa Nge, Mfumu

Landa, mo' ta landa Nge, Mfumu
Landa lumbu na lumbu
Mbasi na mono, nge zaba yonso
Nge ta twadisa mono.

¶ Lomba na Nzambi Kaka vs. 2

Nzambi zola sadisa
Bantu na Yandi mpenza
Yandi mene silaka
Yandi ata sadisa

MVUTU:

Lomba na Nzambi !
Na Nzambi kaka
Lomba na Nzambi
Na zina ya Yesu !

¶ Mfumu Zaba Nzila na Mono

Mfumu zaba nzila na mono
Mono fweti landa kaka
Mfumu zaba nz'ila na mono
Mono fweti landa kaka

Ngolo bubu Yandi ta pesa
Ye yonso ya mfunu mbasi
Mfumu zaba nzila na mono
Mono fweti landa kaka !

Mikanda ya Moize

Mikanda ya Moize, Moize, Moize,
Mikanda ya Moize—Bansiku-Nzambi !
Kuyantika, Kubasika, e Levi, Kutanga
Ye nsuka ke Kulonga, Mikanda ya Moize !

¶ Mo' Ta Kwisa na Nzambi na Lulendo Ve (Vs. 3, Na Makasi Ve)

Mo' ta kwisa na Nzambi na makasi ve
Mo' ta yala makasi yonso na mono
Mo' ta sosa lusadisu na Yandi
Mo' ta kwisa na makasi ve.

Mvutu :

Sambu Yandi kele Nzambi
Mo' ke Nzambi ve.
Kele Yandi me salaka mono !

¶ Ngemba Ikele

Ngemba Ikele
kati na Ntima (3X)

Ngemba Ikele
kati na Ntima
Sambu na Yesu !

Na Katia Abrami

Na katia Abrami,
Nzambi me sakumuna mono,
Na katia Abrami,
Nzambi me sakumuna beno,
Na katia Abrami,
Nzambi me sakumuna makanda yonso.
(Yimba diaka ti diaka.)
Dikanda Abrami
Me pesa beto Yesu !

Na Kati ya Yesu

(Misiki bonso Yesu ke Zola Mono)
Mono vandaka ntama
na Nzambi na masumu
Mono vandaka mbeni
Kansi bubu, kintwadi kele !

Mvutu :

Kinduku kele ! (3x)
Na kati ya Yesu !

Nto Mosi

Nto mosi ya masa
Yo lenda basisa
Basisa bamasa ve
Ya mbote ti ya ndudi.

Munoko kaka mosi
Yo lenda basisa
Mersi ye mafinga ve
Keba munoko na nge !

Nzambi Ke Mbote (Nzambi Kele Juste)

Nzambi ke mbote !
Nzambi ke mbote !
Nzambi ke mbote !
Ke mbote na mono !

Nzambi kele juste
Nzambi kele juste
Nzambi kele juste
Kele juste na beto !

¶ O Keba Maboko, Munoko (Bokuta Ve, Kutonga Ve,

O Keba munoko nki nge tuba ! (Bokuta ve !)
O Keba munoko nki nge tuba ! (Bokuta ve !)
Sambu Tata na zulu

Yandi kele kuwa nge
O Keba munoko nki nge tuba !

Verse ya nkaka--(Kutonga ve)

¶ O Keba Ntima Nki Nge Zola—Makasi Ve

O Keba ntima nki nge zola (Makasi ve !)
O Keba ntima nki nge zola (Makasi ve !)
Sambu Tata na zulu
Yandi kele zaba yo
O Keba ntima nki nge zola (Makasi ve !)

Sambila Bantwadisi Nzambi

(Misiki bonso ‘Mono Kele na Nzo Kitoko’)

Sambila bantwadisi Nzambi
zitisa bo mpi
Sambila bantwadisi Nzambi
Kuzitisa bo mpi
Sambila bantwadisi Nzambi
Zitisa bo mpi
Sambu yai pesa Nzambi kiese

(O Nzambi !)

Sadisa beto
kupesa Nge kiese
O Nzambi,
Sadisa beto
kupesa Nge kiese
O Nzambi
Sadisa beto
kupesa Nge kiese, O Nzambi
Kuzitisa bantwadisi yonso.

Yesu Zaba Zina na Mono

Yesu zola mono
Yandi zaba zina na mono (yimba mbala
mingi)
'Buna mono zola Yandi mpi

Merci na www.freebibleimages.com /Sweet Publishing, /Lambsongs, /Wong Chim Yuen, /Aya and Nicole Velasquez, /Moody Publishers, /Bible Pathway Adventures sambu na bafoto.